

# اموڊون-ومسيگل

## 1. تالائت

غ-يضم-ان غ-يلول-ومسيگل، ايلاس لجال س-ومدلو ايسميضم. ار-د-گاتن-ووسمان غ-يگي ن-يدرارن، ار-يتباقي-وقريان ن-يگيغ غ-يجاريفن عولا تالائت. ار-يصواض-واضو ايتجهدن، ار-د-يگات-ونزار غ-يمي ن-تگمي. غ-يضم-ان ا-د-يفوغ نتان زغ-واحليگ ن-يناس ار-يضمصا.

توت-تفقيرت س-تغيت تيني: «ايلول-د ايلگين، غ-واماس لفرتونت د-يضم ايلاسن.» سقسان-ت: «ما-را-يس-ييلي-اي-واراو-اد؟» تيني-اسن: «ايگيغ ا-را-يسماس عوسان-نس، د-ووسمان ا-را-يسفاون اي-تودرت-نس.» اينكر-وفقير ييني: «عوهو، ژرايت-ت ار-گينغ-يتمناد زوند ايج-يسن ما-يلاان، ار-يضمصا ف-دونيت زوند ايج-يژرا ما-را-ييلي.» گلبن ايلما غ-يگنون، س-ا-تمنادن ايور ايكمل ايسودا غ-گر ايمدلا، ايسوتل-اس-وخورص ن-يزنزارن. ييني-اسن-وفقير: «سفلدايت-يي، لفرتونت ا-د-يزوورن اي-واراو-اد، نتان ا-را-يس-يگرو. ايلول-د غ-تيلاس ايرا-يغ-يزوور س-تيفاوت، ايلول-د س-ووسمان د-يگيگن ايرا-يغ-يسهتو زغ-كولو ما-يگاتن.» تعجبن كولو غ-واوال-اد. ايزايد-وفقير ييني-اسن: «اراو-اد، را-يس-نتيني امسيگل، اشكو را-يسگيل ما-ينتلن، ياف ما-يرگسن، ايل-اغ اغاراس ن-سلامت.»

زرين سين ايسگاسن س-دارسن-تلول يات تاراط، تگ اوتماس اي-ومسيگل، گن-اس ايسم تازويت. توژونط ن-واس ا-تلول نتات، غ-وزمز ن-توگا. اوتن ايسغارن س-وجدديگ ايلنت-تزلفين، فجيغن ايكضاغ غ-يگران عولا لبور. فرحن ايت-تگمي، فرحن عولا كولو ديدسن لمخلوقات ن-ربي، ار-تشكارن غوالي-تن-يخلقن. ژرن كرايگات كرا ايفولكي دارسن غ-ووسان-ان.

ايدور-د-وسگاس، ييلي لجافاف. قورنت-ترگيو عولا اونا، ييلي-وغني ايشقان غ-تمازيرت. ار-تيدون مدن اد-اگمن ماد-سان زغ-يات تالائت ياگوشن. تاروا اور-دارسن ماد-شتان ابلا

تيركمين مژنين، ار-تالا عينا تسن، ار-الان عولا نتني. عيدو باباتسن س-تمدنت ا-يسيگيل س-كرا ن-تووري. عيما افقير عيسكيوس غ-والحنيو اينكابل د-وغاراس، س-ا-يسفليد عي-كرا ن-تاد جارين ار-تيننت ف-تمغارت-نس عيس-ا-يس-تسكار عيسكين. طير-اس باهرا، عيبري تامغارت-نس عيسوفغ-ت زغ-تگمي. اسكاس ن-تاغوفت ا-يگا-وسگاس-ان.

عيزري ما-يزرين س-يمقور-ومسيگل. ار-يسفراح كولو ايت-ودوار، عيفولكي ديدسن باهرا. عيعجب-ت ا-يتقوغ ار-يتيدو س-تاما ن-واسيف ار-يتمناد غ-وامان. بيني د-يخف-نس: «مانيزغ-د-وشكان-وامان-اد؟ والا مانيس ا-تيدون؟» عيغلي س-يگي ن-يان-وورير عيغرض ف-يان-وژرو عيمقورن ار-يتمناد غ-تمدليون ن-يگنون. ار-يتعجاب غ-كولو ما-يتمناد. بيني د-يخف-نس: «ماخ ايليج زكراون عيگنون، ملولنت-تمدليون؟» عيقاما غين اس كولوت بيني د-يخف-نس: «ماخ ايليج ا-توراغ تافوكت غ-توزونط ن-واس، ار-تركيغ غ-دكات؟» ها-يان-واس ياضني عيگاور ايليج-ن-ضر تافوكت بيني د-يخف-نس: «مانيس ا-تيدو تافوكت-اد غ-بيض؟ عيس-ا-تگوز س-توزونط ن-واكال، نيغدا-ن-تخسي غ-ومدا؟» عيگاور ايليج-د-يغلي-وايور بيني: «ماني-د-يگا-وايور-اد؟ عولا ما-يس-يجرون غ-وزال؟ نيس-ا-يتحشام زغ-تافوكت عيحصو عيخف-نس؟ نيغدا-يفسي زوند ادفل اكود نا-د-رغان عيزناران؟» ها-يان-واس ياضني عيگاور غ-تاكانت س-يسفليد عي-تيجيجت ن-واضو زوند عيغ-ا-يتيني: «سيگل را-تافت، سيگل را-تافت.» عيسفليد عي-واوال-اد كراط-توال س-يفسا. يووري س-تگمي غاسان، عيتعجب غ-كولو ما-يلان غ-دونيت.

عولا نتان، ار-گيس-تعجابن اينگان-نس، اشكو عور-ا-يسكار زوند نتني. عور-يري ا-ديدسن-يتمجير عولا ا-ديدسن-يتماغ. عور-ت-يعجيب ا-ديدسن-يتلعاب والا ديدسن عيگاور. ها-يان-واس سقسان-ت: «واي-امسيگل، ماخ ايليج عور-ا-د-ديدنغ-تمشاشكات؟» بيني-اسن: «اشكو تكام زوند عيمسمارن غ-لخنشت، كود يان د-مانيزغ-د-يضي عيخف-نس.» يان-واس ياضني سقسان-ت: «ماخ ايليج عور-ا-نسفليد عي-يسم ن-ربي عيگا عينفورن-نك؟» بيني-اسن: «عيس-ترام ا-د-لديغ نوقت ار-سرس-كاتغ عوزال؟ عور-ا-تادرم عيسم ن-ربي ابلا عيغ-ترام ا-تركام تيكركاس-نون تسنكرم تاثيرت.» يان-واس ياضني نان-اس: «اغاض نا-ور-يتمونون د-وولي، ار-ت-يشتا-ووشن.» عيرار-اسن-د:

«اغاض لي-ور-يتمونون د-وولي، را-ياف توڱا ءور-تا-يٿشين، عيزوور-اسنت س-لخير ءولا نعت.»

ءيلا ڱيسن يان-وحشمي عيسم-نس عيڱيدر، عيصحا. يان-واس ار-يحصا غ-ومسيڱل، يامز ڱيس ار-ت-يدحاي س-يفادن، ايلغ-ن-يضر-ومسيڱل غ-ڱر ءيژران عيبري-وضار-نس ءولا عيخف-نس. ليغ ژران عيحصماي عيدامن، رولن ڪولو، فلن-ت ف-واكال. عيدو عيڱيدر ڱاڪودان س-دار ايت-دار ن-ومسيڱل عيسڪارڪس فلاس بيني: «امسيڱل ان-يلوحن عيژران غ-وانو، عيسڪر امان ف-يمي ن-تحانوت، عيسضر ءوڱوڱ ن-ترڱا.» ليغ عيلڪم-ومسيڱل تيڱمي، عيزايد-اس جديس اڪوراي. نڪرن-د عيرين غ-ومسيڱل، مرا-يس-يوبا ڱاسان ا-ينغ عيڱيدر.

## 2. تارولا

اس ف-واس ار-يٿيدو-ومسيڱل س-تمزڱيدا. ار-يسفليد س-طالب ار-يٿيري ا-يحصو تالوحت-نس، والائي ءور-يلي عيخف-نس غ-تغري. ار-ن-يتمناد غ-شرجم، ار-يسوينڱيم غ-بيڪار مامنك ا-تلعبان غ-ڱر عيژران، ار-يسوينڱيم غ-تيزوا مامنك ا-سڪيزيٽ غ-ورت، ار-يسوينڱيم ءولا غ-يڪرا مامنك ا-سقورين غ-تالعينت، ار-يسوينڱيم ءولا غ-واڪايا مامنك ا-يتاسي لڱا غ-سفساف غ-تاما ن-واسيف. عيسوانڱم غ-ما-يلان غ-تاڱانت بيني د-يخف-نس: «مامنك ا-دي-تمغاي-تسغارت عينن زغ-وژور عيموتلن؟» عيسوانڱم غ-تاڪات ن-تاما ن-تالعينت بيني د-يخف-نس: «مامنك ا-ياقلاي-واڱو ار-دي-تهوادن-وامان؟» عيسوانڱم غ-يجوان دا-ينگرن غ-دڪات بيني د-يخف-نس: «ماني-د-يتگا-واضو؟ عيزد عيسغارن ا-يسرواين لهاوا نيغد لهاوا ا-يسموسون عيسغارن؟» ار-يتمودو لعامل-نس ار-يسلاڪا تاڱانين والا عيجاريفن، عيوين-ت عيسوينڱيم-نس ايلغ ا-يتايلال غ-ڱر عيمدلا د-يتران ن-يگنوان. د-مناوت-توال ا-يشا اڪوراي ف-تالوحت-نس.

يان-واسّ يوورّي س-تگمّي ياف-ن جدّيس عيسكيوس غ-يمي، بيني-اس: «وا-جدّي، کرا  
ن-تغاوسيو عور-رينت ا-يّي-تياوفهامنت.» عيساول-د جدّيس بيني-اس: «امالو ن-تايئيوت  
ياگوگ ف-يژوران-نس. زايد اي-يوي، ار-تسقسات ارد تافت مايّلي تريت.»

غ-ووستان ان تلکم لوقت لي-غ-را-تارو عيناس ن-ومسيگل تيس کراط-توال. تاوالا-ياد  
ترفون باهرا، عيضر-د زغ-گيس بنادم. تضعف تهرش، تقاما غ-لفرش، عور-تضرار ا-تنکر.  
سين-بيرن ا-تگا غ-گر تودرت د-لموت. يوورّي-د-ورگاز زغ-تمدينت، ايژر مامنک ا-تگا.  
عور-سور-تضرار اي-تووري ن-تگمّي، عيفرو-اس، ياوي طايّاض. توورّي نتات س-دار  
ايت-دارس، تزري ديدسن غير کراض-بيرن تمّت. تامغارت لجديد، عور-تحميل امسيگل  
عولا عولتماس تازويت. غمکلي تينين عيمزورا، عيضارن ن-يکيکيلن ار-سايالان اگدرور  
غ-ليالي ار-سکارن تالاغت غ-سمایم. عيرين اد-فکن تازويت اي-يان-ورگاز غ-تمدينت  
عيففور دين اي-باباس. ها-نتات عور-جي-تري ارگاز-ان عولا تسن-ت. غير کراض د-مراو  
ن-وسگاس اډارس-يلان. ار-تالا سين عيطيط. عور-يوفي-ومسيگل مامنک ا-يتصبار عولتماس  
اشکو گوتن-اس عيمطاون عولا نتان. گوژ-ووستان ا-يقامان اي-تمغرا.

غ-يضر-ان اد-وشکان عيمخارن، غزان غ-تبيا ن-تحانوت، اکرن صندوق ن-يقاريدن.  
ليغ-د-يغلي-واسّ اشکين-د عيد-بو-تحانوت، ار-تکان تيگمّي س-طايا ار-سقسان ايت-تگمّي  
مانیغ لان غ-يضر-ان. افن ايت-ودوار کولو لان غ-تگمّا-نسن، ابلا امسيگل. اشکو  
غ-يضر-ان عيتبا کرا ن-يتران ضرن-د زغ-يکنوان، عيفوغ ايژر مانیغ ضرن عيزد غ-تاگانت  
نيغد غ-تسگا ياضني اي-يدرارن. بيني-اسن عيگيدر: «ژريغ امسيگل عيفوغ-د زغ-تگمّي،  
عيفتو س-تسگا لي-غ-تالا-تحانوت.»

دوون غاکودان زوکرن-د امسيگل زغ-لفرش-نس، لوحن-ت-ين غ-يات-تسرافت، فلن-ت-ين  
بلا ما-يشتا عولا ما-يسا. امسيگل عيگلين، عور-يسين ما-يجران. عيسفلد اي-يحشماي  
ار-اقران غ-تمزگيدا، والايّي عور-د-دارس-يوشکي يان. عيقاما غين سين-ووستان  
د-سين-واضان، ماغن عيسوينگيمن غ-يخف-نس، ايليغ-د-وشکان کرا ن-ايت-ودوار،  
سغلين-ت-يد. بدون ار-ت-کاتن س-يکوراین ار-تينين: «ماياد ا-يستهلّا-ومخار.»  
سوفغن-ت-يلما زغ-گر-تگمّا. دحين-ت-ين غ-گر-يگران، ستابعان-اس ايژران.

ياون-ومسيڪل ٿي-وغاراس ن-تاڳانت، عيفتو ايليغ عيرمي. عور-سور-يژضار ا-يزايد. عيتغاشا  
 عيڪلين، عيضر س-واڪال غ-دو يات تازارت عيڪن. عيڪ لجال ڪرا س-د-يتفاق، عيسفلد  
 عي-واوال ن-تفروخت. عيڪلب ياڪز-ت-ين عيزد تازويت ا-تگا. تازل-د س-دارس تيني-اس:  
 «واي-امسيڪل ما-يڪ-يجران ايليغ ترفونت غمڪاد؟ ماتا غايداد د-يدامن عيلا ن  
 غ-وودم-نڪ؟» ييني-اس: «غمڪاد-يي-تمنات اولتما، عور-سينغ ما-يجران.» تامر-اس  
 غ-وفوس تيني-ياس: «اشڪ-يد مون ديدي س-تگمي.» عيرار-اس-د: «عوهوي اولتما،  
 عور-يي-رين ايت-تگمي عولا ايت-ودوار، طين-يي-د س-يژران. راددوغ غيلاد اد-سيڪلغ  
 س-ڪرا ن-تمازيرت غ-يلا لامان عولا سلامت.» تيني-ياس تازويت: «ريغ اديڪ-مونغ  
 ا-گما.» ييني-اس: «عوهو، عور-تضرارت ڪمي عي-وغاراس-اد، عيشقا فلام باهرا.»  
 تيني-اس: «واخا عيشقا، ما-ن-فلغ غ-تگمي ابلا تامارات-ترفونت؟»

سفلدن غاڪودان عي-واوال زوند يان عيتمشموشن غ-يفراون ن-تازارت ييني: «سيڪلات  
 را-تافم، سيڪلات را-تافم.» ڪراولن س-اسن-د-بيان جديتسن عيفتا-د. تيني-اس تازويت:  
 «وا-جدي، عيزد ڪيي ا-ينان اول-اد؟» ييني-اس: «عوهو، عور-نيغ يات ا-يلي عيعزان.»  
 عيسقسا-ت-ومسيڪل: «ماخ ايليغ-دي-تفوغت ا-جدي س-تاڳانت-اد؟» ييني-اس: «زايد  
 غيلاد اي-امسيڪل. عيقدر فلاڪ ربي ا-تسقسا-ت-ار-تسيڪيلت. هاتي توسعا دونيت-اد. زايد  
 ار-ڪيس-تسيڪيلت ارد تافت لحق ڪولوت، تيسانت ڪرايڪات ڪرا غايڪلي عيڪا، تفهمت  
 ڪولو ما-فلائغ-ينتلن.» تيني-اس تازويت: «وا-جدي، راديدس-مونغ.» «زايد ا-يلي عولا  
 ڪمي، را-گيم-يتهلا گمام. سنج ارڪاز لي-ڪم-د-يضالبن نيزد اسڪايري ا-يڪا. يوف  
 ا-ن-فلاس-تاڪوڪت.» عيسماقل-ڪيسن-وفقيير ييني-اسن: «سفلدايت. عيلا سور داري  
 ما-يوون-تينيغ. اور-تاسيم لهم ف-لامانت-نون، اشڪو تياوحضا داري ارد-دي-تووريم.»  
 يال عيلما افس-نس. عيسودن-اس-ومسيڪل ت-تازويت عيخف، عينڪر يووري س-ودوار.  
 زايدن نتي غ-وغاراس. تساؤل تازويت تسقسا گماس: «مالامانت ف-يساول جدي؟»  
 ييني-اس-ومسيڪل: «عيلا دارس ڪرا، عور-سينغ ما-يڪا. عيسن ڪرا عور-ت-نسين نڪني.»

### 3. بو-يکشوڙن

غمکان اس-دآن، فتون س-تڙا تازوٽ ڪرا عيضر غ-وغاراس غ-گر توڳا. تکنو تاسي-ت، ٽيني-اس عي-ومسيڪل: «تاڳلايت ا-تڳا، والائيني عور-جي-ژريغ وان تاڳلايت-اد. هاتي تقور-تخشاشت-نس، عور-را-ترڙ.» تاوي-ت س-ومڙوغ-نس: «لعجب اباد، تاڳلايت-اد ار-تساوال ار-ٽيني «تاك تاك تاك». مان اڪضيض ا-يسضارن وان ختاد؟» ييني-اس-ومسيڪل: «عوهوي ا-ولتما، عورد تاڳلايت ا-تڳا. ختاد سفلدغ فلاس. «لماڳانا» ايس-ٽينين. ژر تاسميوين-اد، ار-تلوليينت ار-مالانت مان تاساعت عيلڪمن.» ٽيني-اس: «ماني-دي-تگا س-غيد؟» ييني-اس: «حاقان تضر عي-ويلي-د-يگان سوق نيغد تامدينٽ.» ٽيني-ياس: «لعيلم عيگوتن اد-سن ويلي عيسڪرن لعجب-اد. عيس-ورد لعائل عولا تاحڪيمت عيگوتن ا-دارسن-يلان؟»

عيزايد-ومسيڪل د-وولتماس غ-واماس ن-تاڳانت ايليغ لڪمن يات-تگمي عيمڙين. ٽياوسڪار زغ-وڪشض، غ-تامان-نس يان-وگودي ن-يکشوڙن. عيغر-ومسيڪل س-وانا گيس عيزدغن، عيفوغ-د يان-ورگاز د-وگنلزم ف-تغراض-نس. ليغ-تن-يڙا، عيسرس اڪلزم اينسالام ديدسن، ياي-اسن-د اد-سون. ار-ساوالن ف-يسغارن د-يکشوڙن، عيسقسا-ت-يلمما-ومسيڪل: «وا-بو-يکشوڙن، عيزد کيي واحدوڪ ا-يزدغن غ-تاڳانت-اد؟» ييني-اس: «عوهو، لان ديدي ڪرا ن-يمدوگال-ينو، اتن-يگان د-يوغاغ د-يگرداين د-يسوا.» ٽيني-اس تازوٽ: «ايس-ا-تجماعت د-يمدوگال-اد-نڪ؟» ييني-اس: «عوهو، ڪود يان عيقاسا تاووري-نس. ژرايت يوطفان ت-تيزوا د-يگضاض مامنڪ ا-تيدون ار-دي-تاشڪين، ار-تاسين ار-دي-تاوين.» ٽيني-اس تازوٽ: «ايمما عيسغارن د-يشدران غير سڪيوسن نٽني.» ييني-اس: «حتا عيسغارن د-يشدران ار-ن-مدين عيفراون عي-تافوڪت، ار-شڪشامن عيڙوران-نسن س-دو-واڪال اد-سان امان، ار-سڪارن عيجديگن ار-اگان لغت. عيس-ورد تاووري ايان؟ غير بنادم د-لبهائم-نس اور-پيڙين اد-خدمن.» عيسقسا-ت-ومسيڪل: «ما-يسڪارن لفائت، عيزد اوطفوف نيغد اسردون؟» ييني-اس بو-يکشوڙن: «ار-يتاسي-ووظوف س-لخاطر-نس، ايمما اسردون س-بزز. ار-يسڪار-ووظوف س-واوال ن-يد-سيديس، ايمما اسردون عيخصا-ت-ديما-وڪوراي ن-يد-سيديس. اوطفوف

ار-بدآ-یتازال، عیما اسردون عیغ-ور-یلّی سیدیس را-یبید. عیغ-ور-یبید را-یمورّی.  
عیغ-ور-یمورّی را-یشّ احلاس-نس. >> ار-کولّو-ضصان.

بینی-اسن عیلما بو-یکشوضن: >>عیبان-یی عیس-یکوت لعافل دار ایت-تاگانت عوگار  
ن-ایت-تمدینت. عورد لکتوب ا-ناقرا، والاینی ار-ناقرا ما-یتیاران غ-یمدلا ن-یکنوان  
ت-تالاغت ن-واسیف ت-تاشایت ن-یسغارن. سفدایت، را-یون-ملغ ماد-تلمادغ  
زغ-یبخوشن ن-تاگانت. اشکو عیلا یان ار-یسوفو غ-تیلاس، ییلی وایاض ار-یژطا شبکت،  
ییلی وایاض ار-یتارا س-وخلول-نس ف-واکال، ییلی وایاض ار-یتلعاب تاکورت. ار-سقساغ  
عیخف-ینو <مانی-د-گان عیبخوشن-اد؟ نیزد نتنی ا-یسکرن عیخف-نسن واحدوتن، نیغد عیلا  
ما-تن-یخلقن؟>>>

تمل-اس تازویت عیلما لماگانا لّی-توفا غ-تاما ن-وغاراس، تینی-اس: >>ژر تاگلایت-اد نوفا.  
عیس-ورد لعيلم عیگوتن اد-سنّ ویلی عیعدلن لعجب-اد؟>> بینی-اس: >>لعيلم ادارسن-یلان،  
والاینی عیلا ما-یوگرن لعيلم-اد غ-تاگانت. ختاد زغ-تسکرت تاگلایت عور-تگی زوند  
تاگلایت ن-صاحت، عور-را-زغ-گیس-تفوغ-تکضیط. عور-تضرار ا-تمقور والا ا-تارو. عیما  
تیگلای ن-یکضاض، عیلا گیسنت ما-یوگرن ختالی توفیت. اشکو کرایگات تاگلایت، تلا  
گیس یات-تکضیط عیمژین عیتموسون س-روح ن-تودرت. غاکود نا-تفوغ-تکضیط را-تمقور  
ار-تایلال ار-تاسی لغا، تسکر اسود-نس ت-تگلائی-نس عولا نتات. نیس-تضرار مدن  
اد-سکرن وان لعجب-اد س-لعيلم-نسن عولا تاحکیمت-نسن؟ عیگوت لعافل ن-بنادم،  
والاینی توگرت-ت-باہرا-تحکیمت ن-والی عیخلقن بنادم. نکرایت غیلاد ا-نسیتی  
عیکشوضن-اد عور-تا-د-یفی-ونژار.>>

اسین عیکشوضن ایلیغ-تن-ین-گان کولّو غ-ونتال ن-تگمی، کاورن عیلما غ-وغگمی.  
عیزاید بو-یکشوضن بینی-اسن: >>سوانگمغ غ-کولّو مایاد، ار-سقساغ عیخف-ینو  
>عیغ-یوجاد یان عیخلقن دونیت-اد، مامنک ا-یگا؟ م-س-را-ت-یسانغ؟ عولا مانبع  
را-ت-افغ؟ نیزد تاگانت نیغد عیگران؟ نیس-تضرارغ اد-اتیغ س-گر عیتران ار-سرس-سیگلغ  
غ-لمجد ن-یگنا؟ هاتی سقساغ تافوکت والا ایور >عیزد کونی ا-یخلقن دونیت-اد؟>  
عینن-یی-د <عوهو.> سقساغ عیدرارن والا عیجاریفن <عیس-گیگون کرا ن-روح لّی-یخلقن

دُونيت-اد؟» عينين-يِي-د «ءوهو.» سقساغ لبحار والا عيسافن «عيس شيگون كرا ن-تحكيمت لي-يخلقن دُونيت-اد؟» عينين-يِي-د: «ءوهو.» سقساغ-تن عيلما كولوتن «ليغ ءورد كوني-ايخلقن دُونيت-اد، ملايت-يِي ما-ست-يخلقن.» عينين-يِي «عيللا يان يوكر-اغ، ءور-ا-يتبايان ءي-والن ن-بنادم، نتان اغ-يخلقن.» ءورد اوال اس-تن-سقساغ، ءورد اوال اس-يِي-جاوبن، والاييي تاحكيمت د-وفولكي لي-س-تياوسكارن ا-يِي-يملان لجاواب.»

عيسقسا-ت-ومسيكل: «مامنك ا-يكا والي عيخلقن كولو ماياذ؟» بيني-اس بو-يکشوضن: «اغ-ا-نتمناد غ-وايور د-يتران، ار-اغ-مالان مامنك ا-يكا نور-نس. اغ-ا-نتمناد غ-تافوكت ءيحران د-ضربات ن-ووسمان د-وقريان ن-يكيگ د-ونگاي ن-يسافن، ار-اغ-مالان جهد-نس. ار-يتبان-وفولكي-نس غ-يجديگن ت-تفراوين ن-يسغارن. ار-تبان-تحكيمت-نس غ-يکشوضن ت-تيزوا لي-مي-يفكا كود يان تاووري-نس. اغ-ا-نتمناد غ-يجاريفن د-يدرارن، نيسان عيس-يدوم عيزگا. اغ-ا-نسفيد ءي-يکشوضن ار-تاسين لغا، نيسان اوال-نس عيس-يميم. نيغ-نثرا مامنك ا-نگا نكني ن-بنادم، ار-نتمناد ار-نسفيد ار-نسوينگيم ار-نساوال، نيسان عيس-ا-يتمناد ار-يسفيد ار-يسوينگيم ار-يساوال ءوگار-نغ. اشكو والي عيخلقن، ءيرا-ياگر مايي عيخلق. د-غاكود نا-نكاور غ-واماس ن-كولو تيغاسويين-اد، ار-نسحسو س-لحنانت-نس والا سلامت-نس، عيمر-وول-نغ س-لحمد د-شوكر.»

ضرنت تيلاس، ءيثر-تن بو-يکشوضن رمين. عيسرس-اسن-د اغروم د-زيت، عيفك-اسن عيفرساخن عيمل-اسن مانيع ائ-گان. بيني-اس-ومسيكل: «وا-خالي، ءور-جي-سفلدغ ءي-وان ءيواليون-اد مي-دارك-نسفلد غاسا.» بيني-اس بو-يکشوضن: «حاقان ءور-جي-تسقسا-ت-يخلاقن كرا ن-يان عيزدغن غ-كر لمخلوقات ن-تاكانت.» عيسقسا-ت-يلما-ومسيكل: «والايي والي-اغ-يخلقن، ما-يلان غ-كراغ ديدس؟ فهمغ نيس-تگا دُونيت-اد زوند لماگانا، تياوسكار س-تحكيمت عيگوتن. والايي غ-ليغ-ت-يخلق ربي، عيس-ت-يعمر عيفل-ت-ا-تزايد واحدوت ار تخوو، نيغد را-ست-بدا-يتعمار؟» عيمناد كيس بو-يکشوضن بيني: «كرا ن-تواليو ار-سوينگيم نيس-ن-فلائغ-ياگوگ، عيسكلب فلائغ ءودم-نس زوند يان يوضرن-د ءي-يوظفان. عيما كرا ن-تواليو ياضني ار-سوينگيم نيس-ا-ست-گينغ-يتاوي ار-اغ-يسكار لخير. كرا ن-دور ار-سوينگيم نيس-يرا اغ-يتعاوان غ-يشابوكن ن-كرايگات اس. عيما دور ياضني ار-سوينگيم نيس-اغ-يگابل غير



ا-فلاغ-يکات لحوکم ف-لعيب لي-نسکار. تيغاوسيوين-اد عور-رينت ا-يي-تياوفهامنت. عيما  
 غيلاد، هاتي عيدا-بيض، کنایت ار صباح.»

ينکر-د-ومسيگل زيک صباح، ياف-د-بو-يکشوذن عيسرغا تاکات ايگ-ن امان ن-واتاي.  
 ييني-اس-ومسيگل: «نرا ا-يک-نزار ف-وفولکي-اد گينغ تسکرت.» ييني-اس-بو-يکشوذن:  
 «عور-يي-يخصا يات، والايي اويایت دیدون تيغاوسيوين-اد ما-س-ا-دي-ترارام ما-تشتام  
 غ-وغاراس.» عيفک-اس يان-وقراب، عيلنت-کيس-تمسمارين ن-صباط ت-تغاريوين ن-جلد  
 ت-تاسمي د-يفالان. ليغ سوان اتاي عيفک-اسن ما-يقامان ن-وغروم يازن-تن س-سلامت.

#### 4. بو-وخريب

زايدن فتون ايلغ-ن-لکمن يان-وخريب، افن-ين يان-ورکاز ايگاور غ-يمي-نس، عور-يلسي  
 ابلا عيشرويذن. عينن-اس: «سالامو علايکوم.» عور-اسن-د-يرور س-يات، عيقاما  
 غمکلي، يودر اي-يخف-نس. عيسقسا-ت-ومسيگل: «وا-خالي، اي-رئي مانيس  
 ا-يتاوي-وغاراس-اد؟» عيسماقل-د کيسن ار-يسوينگيم، ييني عيلما: «کيس اساون کيس  
 اگسار، ار-يتاوي س-وفلا والا عيزدار.» ييني-اس-ومسيگل: «ا-خالي، تزدغت کيي غ-تاما  
 ن-وغاراس. عيس-ور-تسنت مانيس ا-يتاوي؟» عيفسا مناشک ييني عيلما: «حتا يان  
 عور-يسين مانيس ا-يتاوي.» عيتعجب-ومسيگل ييني-اس: «عيس-ور-دارس تما؟» يادر-داغ  
 بو-وخريب اي-يخف-نس ار-يسوينگيم: «ايوا، ما-را-يک-ينغ؟ عور-جي-يلي ما-د-يگان  
 تما-نس. حاقان عور-دارس تما.» ييني-اس-ومسيگل: «ايگنوان عور-دارسن تما، والايي  
 ار-تن-تکان ايگضاض ار-لکمن ماني ران. يان عيمون د-وغاراس-اد، ايغ-ور-يضرار ا-يلکم  
 تما-نس نيس-ور-را-يلکم کرا ن-ماني؟»

ينکر-د-بو-وخريب يامز-اس غ-وفوس ييني: «لمعقول ايد-س-تنت، افغ-ک-ين عيفسوس  
 لعاقل-نک ار-توزانت کرا عيلان. سفلد ا-يوي، ا-يک-ينغ. لمشماش، سموس عيد-ميا  
 ن-يفراون ا-يسکارن يات تالمشماشت. عولا رمان، افص ن-يفراون ا-يسکارن يات  
 تارمانت. بنادم، ايغ-يرا ا-ييني يان-واوال لمعقول، ايخصا-ت ميا ن-وسوينگم د-ميا

ن-وسماقل ٺور-تا-يرٺيم ٺيمي-نس. >> ٺيتعجب-ومسيكل س-وٺار. ٺيزايد بو-وخريب ييني-اس: >>ا-ك-سقساغ، ماخ ايليج-اغ-يسكر سيدي ربي سنات-والن د-يان ٺيمي؟ ماخ ايليج-اغ-يسكر سين ٺيمزگان د-يان ٺيلس؟>> ييني-اس-ومسيكل: >>اشكو ٺيرا ٺينغ-اتمناد ار-نسفلد ٺوٺار ن-ما-نساوال.>> ييني-اس بو-وخريب: >>ماخ ايليج ٺيسكر ٺي-بنادم ا-يتقن ٺيمي-نس، ٺور-ا-يتقن ٺيمزگان-نس؟>> ييني-اس: >>باش ا-نسفا ار-نسفلد.>> ييني-اس بو-وخريب: >>ما-ف-اغ-يسكر ربي تارٺا-يا ن-نيك-ومٺوغ؟>> ييني-اس-ومسيكل: >>ا-خالي، ٺيي ا-يسن.>> ييني-اس: >>اوال نا-ور-ك-ٺيعجين تزريت-ت زغ-ٺيس، ياوي-ت-واضو. ووزن اوال نا-مي-تسفلت ا-يوي، تزت ٺيزد لٺق ٺولا لمعقول ا-يكا نيغد ٺوهو. اشكو غ-تاقاين ٺور-ا-تساوال غير تالي ٺيخوان.>>

ٺيفسا-ومسيكل، ٺور-يزعم ا-ييني يات. ٺيفسا بو-وخريب ٺولا نٺان. ٺيساول-ومسيكل ٺيلما ييني-اس: >>وا-خالي، نمناٺار د-بو-يکشوضن، ٺيمل-اغ نيس-تفولكي ٺونيت، تياوسكارن ٺيس ٺيگضاضن د-يچديگن د-بيخوشن س-تٺڪيمت ٺولا لٺيلم ٺيگوتن، ييني-اغ >>ٺيلا يان ٺيخلقن ٺرايگات ٺرا.>> ٺيما نكي، ٺريغ نيزد لالوان ا-يسفولڪين ٺونيت-اد. اشكو مرا-يس-يلا غير ٺيضيلى د-ومليل ٺور-را-نيسان ما-يگان افولكي. ما-ور-فهيمنغ، ماد-گان لالوان-اد والا ماني-د-گان؟ ٺيملول-ودفل س-وسميض، تملول-تڪلايت س-ترغي، والايني مامنك ا-يمشاشكا-وسميض ت-ترغي ا-سكارن ٺيمللي؟>> ييني-اس بو-وخريب: >>ار-ٺرٺيغ تافوكت س-وزوزوو ن-دٺات، ار-ٺترٺيغ-ووژال س-ترغي لٺافيت، والايني مامنك ا-يمشاشكا-وزوزوو ت-ترغي ا-سكارن تازوغي؟ ٺور-سينغ ماخ ا-يوي.>> ييني-اس-ومسيكل: >>ٺيگوت ما-يلان غ-ٺونيت-اد ٺور-ت-نسين ٺولا نفهم-ت، نڪني-اد ن-بنادم.>>

ييني-اس بو-وخريب: >>اڡاراس ٺيس اساون ٺيس اٺسار، ٺور-سار-را-تلكمت تما. ها-ياغ نكاور غ-تاما ن-وڡاراس ار-نمناد ار-نسفلد والايني ٺور-تا-نسين ما-ٺيس-يلان ٺولا ما-را-ٺيس-ييلي. ها-بو-يکشوضن-ان، ٺيمل-يوون ٺيس-تفولكي ٺونيت. ٺيما نكي را-يوون-ينغ اوال ياضي، اشكو ٺيچرا ٺيس ٺرا لي-يسخصرن افولكي-نس. نكي ٺريغ ٺونيت، زوند ٺور-ٺي-اد ا-ٺكا.>>

بيني-اس-ومسيگل: «وا-خالي، سَفهم-يِي لمعنا-ياد؟» بيني-اس-بو-وخريب: «ايغ-تسيگلت س-لمعقول را-تثرت عور-يلِّي کرا يُخشن زغ-يخف-نس. کرايگات کرا ايگا-تین ايغولکي والايي ار-ت-يتهلاك کرا ياضني. زوند ايغ-تکشم س-ورتني ن-لوز، تثرت مامنک اد-سَفراحت تياوين-نس. والايي ايغ-ن-کيس-تثريت واژگاغ، هاتي ايغسَخصر افولکي-نسنت. ژر-داغ ايغ-تسويت امان ن-واسيف، ميمن زوزوان والايي لانت کيسن تيضاً راد-سَهرشت وانا-تنت-يسوان. نيغد ايغ-تکشم س-کرا ن-تگمي، تافت-تن-ين ايلول دارسن يان-واراو ايغولکين ايصحان، ايمقور-د س-يگا اژنوم. نيغد يان ايجرز تومژين گنت تيگلاسين، غير سَوفغت تيزلفين رکمت. ژر-داغ ارگاژ مامنک ا-ييري تامغارت-نس ار-فلاس-يتصيار کيگان، ار ايجشم کرا غ-کراتسن ايفرو-اس. واخا ايننا يان تيگمي ف-ساس ايزگان، رادشرن ايجودار-نس اولا تادولي-نس تيگيرا. ايبان غ-کولو لمخلوقات ن-ربي نيس-تن-ايخلق فولکين س-وفولکي ايجمَلن، والايي ايجشم کرا غ-کراتسن د-وفولکي-نسن ار-تن-يسَخصار.»

ايسقسا-ت-ومسيگل: «والايي ما-يگا غايي-تن-يکشم ايسَخصر-تن؟» بيني-اس-بو-وخريب: «تعمّر دُونيت س-ايلوليتن د-يموشا.» ايسقسا-ت-ومسيگل: «ايزد ايلوليتن د-يموشا ايسَخصارن دُونيت؟» بيني-اس: «اوهو، والايي مدّن گان زوند ايلوليتن نيغد ايموشا. ها-ايلولي ار-يسوسوس ايفراون-نس ار-ايلولي غ-تسگا-ياد اولا ختا، ار-ت-يتاوي-واضو س-اغيد اولا غي، ار-ايساگيل س-وجدديگ دا-کولو-ايحلان غ-ايجديگن. غمکان اد-گان اولا مدّن، عور-سین مانيع راد-افن مايي ران. اولا اموش، ار-ايتطالي اي-تمغلت-نس، ار-ايتدوار ايزورض اس-ت-ايغوي، والايي عور-ت-يلکيم. غمکان ا-يگا بنادم، ار-ايتطالي اي-ومالو-نس. را-ايتزال ارد ايسغ-وول-نس، عور-يلکيم مايي ايرا. ايغ-اک-يومژ-وموش تمغلت-نس، ما-را-يس-يسکر؟ را-ست-ايفيژ سنات-توال ايفل-ت، اينکر ايفتو. عور-سور-را-ست-اياوي غ-تمغلت-نس. بنادم عور-يسين ما-ايرا اي-ايغ-نس. ايغ-اک-يوبا ما-ايرا، عور-را-ت-ايغج غاکودان. عور-سین مدّن ماد-تيرين. عور-سین مانيع ايلايي ران، والا سن مامنک اد-تفراحن س-مايي اوفان. ايجشم-نيت کرا غ-کرا بنادم د-لعاقل-نس ار-ت-ايسَخصار.»

عيسقسا-ت-ومسيگُل: «نيس-تسنت ما-يگان گُر بنادم د-لعامل-نس؟» بيني-اس بو-وخريب:  
 «حاقان غايلي عيجران عي-دونيت، عيجرا عولا عي-بنادم، عور-سور-يگي غمکلي-ت-يخلق  
 ربي. عيبان غ-دونيت عيس-تعمّر س-واطان عولا زالت عولا کولو ما-يُخشن. حاقان عيجرا  
 کرا عي-دونيت، تگوز-د فلاس تاگات. اشکو ار-يتهراش کولو ما-کيس-يزدغن، ار-يتمتات.  
 امار کيس يوفان صاحت عولا راحت، واليني کولو ماحد زراين عيسکاسن، ار-تيدراس  
 راحت عولا صاحت. غمکاد ا-تگا تودرت-نغ، اشکو عيهرش بنادم، عيزدغ غ-دونيت  
 عيهرشن.»

يامژ-يلمّا-ومسيگُل ت-تازويت اغاراس-نسن. عيسافض-تن بو-وخريب س-سلامت بيني-اسن:  
 «عغ-ن-توفام يان عيسن ما-يجران عي-دونيت عولا ما-ست-يسخصرن عولا مامنک ا-را-نجم  
 زغ-تاگات-اد فلاس عيگوزن، توريم-د تينيم-بي-ت.»

## 5. تافقيرت

عيلولي-وغاراس غ-گُر عيسغارن، ار-يفتو-ومسيگُل ت-تازويت ايلغ تلکم توژونظ ن-واس،  
 رمين عيغ-تن عيريفي. افن-ين يات-تفقيرت ار-تَحشاش. تغر-اس-ن تازويت: «وا-خالتي،  
 عيس-دارم عيمک ن-وامان ن-تيسي؟» تيني-ياسن-د: «اشکاد ا-يوون-ملغ تالعينت.» مون  
 ديدس، س-زرين ف-يات-تحشوش تياوسکار زغ-وغانيم د-وليلي، اون عي-يات-تغاراست  
 ايلغ لکمن تالعينت، فتان-زغ-کيس-وامان زوزوانين.

غير سوان، غرضن ف-واکال غ-تاما ن-تالعينت اد-سونفون، س-د-فلاس-يسايک-بيضص.  
 ليغ-د-يتفاق-ومسيگُل س-يسفلد عي-تفقيرت ار-تالا. عيسفاق-د عولا عولتماس، نکرن  
 عينين-اس: «ما-کم-ياغن ا-خالتي ايلغ ا-تالات؟» تامژ-اس تازويت غ-وفوس تيني-اس:  
 «ما-يم-تگا لوقت ا-خالتي؟» تيني-اس: «تشقا دونيت-اد، عور-ت-يسين ابلا  
 وانا-ف-تزري.» تقاما کيسن، عينين-اس: «اور-تالات ا-خالتي. غير عيني-اغ ما-يلان عولا  
 ما-يم-يجران.» تيني-اسن: «احاينو، عور-داري يان غ-دونيت-اد. عور-سور-يلي  
 ما-ست-کيگي-يتاوين غيلاد غ-وسرغ. زغ-مژبي-ينو ار-تعاوادغ عي-ربي لهم-ينو، عيما

غیلاد غ-یې-فلن مدن، عیفل-یې عولا نتان. عور-سور-ا-یې-یسفلید عولا ایرا-یې. عیفل-یې غ-تمارات-تکوضی. «تینی-اس تازویت: «نکنی، عور-را-نتو افولکی-اد کینغ تسکرت.» تینی-اس-تفقیرت: «ژرایت تاکات-اد، مامنک ا-گیس-تسکار لعافیت. ار-تایالان عیمدوکیکن، ار-تاستوانت-ترکین. لخیر نا-تسکرت دا-یتایلال ار-یفال عیغد.» تینی-اس تازویت: «عیس-ور-ا-یتیا تایی لخیر لی-نسکار س-دار ربی؟» تینی-اس: «ما-یسن عیس-یرا ا-یلکم دار ربی نیغد ووهو؟ ها-یاغ غ-واماس ن-یغد، تاغوسا-یاد کاد-سنگ.»

تینی-اس تازویت: «باراکا زغ-یمطاون ا-خالتي. غیر عینی-اغ ف-لهم-نم باش ا-نيسان مامنک ا-کم-نتعاون.» تساول-د-تفقیرت تینی-اس: «عیس-ترام ا-تيسانم؟» تمناد گیسن تینی: «ا-کن-ینجا ربی زغ-ینواشن-ینو لی-یې-یسنگاران د-ورگاز، اشکو نان فلا ما-ور-سکارغ، عیسمسر-یې زغ-تکمی. ووریغ س-دار ایت-داری، افغ-تن-ین کولو موتن، افغ-ن مدن یاضنی ا-یزدغن غ-تکمی-نغ، عیوین-ت س-یفادن. ضرغ تغاشاغ. لیغ-دی-تفاقغ، افغ-د عولا سنات-تقاریدین لی-داری-یلان تیاکارن-یې-د. ضرغ-داغ س-واکال، عور-سینغ ما-راد-سکرغ عولا مانیس راددوغ. هاتی کسن-یې کولو ما-داری-یلان، لا ارگاز، لا تاروا، لا تیگمی، لا عیقاریدن. ژرایت مامنک ا-یې-یسرفوفن ربی. ها-یې غیلاد غ-تاگانت غ-گر لوحوش، سوتلن-یې عولا ویلی عور-یتبان. اس ف-واس ار-د-سمونوغ توکا د-یفراون عولا لغت ن-تاگانت. کرا، ار-ت-شتاغ کرا ار-زغ-گیس-سکارغ عیسافارن ما-س-ا-تداواغ وانا عیهرشن. عیما کونی مانی ترام؟ عیس-ور-تاگوکم ف-ایت دارون؟»

تینی-یاس تازویت: «وا-خالتي، ار-نسیگیل س-کرا ن-ماني غ-یلا لامان عولا سلامت.» تینی-اس: «عیزد عیگنا ا-ترام؟ اشکو عور-را-تافم لامان عولا سلامت غ-دونیت-اد. کولو ما-یطافن تودرت ار-یتاغد افلا، ار-یتیری ا-یلکم عیگنا. ار-دی-تنکر توکا، ار-یسفسار-وغانیم، ار-اټین عیسغارن، ار-تیغزافن-یحشماي، ار-اقلاين عودادن، ار-تایالان عیگضاض. ار-کولو-تیرین ا-ن-اکمورن س-سیدی ربی. والایني ما-یرضارن ا-یلکم عیگنا لی-غ-یلا نتان؟ ژرایت ما-یسن-یتیلین. کولو ما-یران ا-یائی، عیقان-ت-ید ا-د-یووری س-یزدار. ار-تیقار توکا، ار-د-یکنو-وغانیم، ار-طارن عیسغارن، ار-دی-تگوزن عودادن،

ار-دي-ٿراسن عيڱضاض، ار-تمتاتن تاروا، ار-توورين ڪولو س-واڪال لي-زغ-تياوسڪارن.  
 عور-يڙضار يان ا-يروح تائيت عيڪشم س-لامان لي-يڙوڙض.»

بيبي-اس-ومسيڪل: «سفلدغ ف-يرڪازن غ-لجنت عيزد عيڱلدان مقورين ا-راد-گن.»  
 تمناد گيس تازويت تيني-اس: «عيمّا نڪنٽي-اد ن-تمغارين، نيس-ور-را-نيلي غ-لجنت؟»  
 تيني-اسن-تفقيرت: «ءور-اڪ-ا-نڪشم نڪنٽي س-تمزگيدا، مامنڪ ا-را-نڪشم س-لجنت؟  
 نڪنٽي ن-تمغارين، عور-نسين مامنڪ ا-نٿڙا عولا نفهم عيواليون لي-س-ا-ٿڙالان. ياڪوڱ  
 فلانغ ڪولو ماين.» تيني-اس تازويت: «ا-ور-تالات ا-خالتي. عيرا-يغ-يرحم ربي،  
 عيغ-يرا.» تيني-اس-تفقيرت: «وا-يلي، ما-س-را-نيسان نيس-يرا نيغد عوهو؟» تيني-ياس  
 تازويت: «ار-تئين عيڪا ربي ارحيم.» تيني-اس-تفقيرت: «والايني ما-يسن  
 عيس-زغ-گيگي-يحنّا نكي عولا ڪمي عولا گمام؟ امار يوفان ا-ييلي ڪرا ن-يان عيڙضارن  
 ا-يسهڻو عول-نغ زغ-ڪولو ما-زغ-ا-نيڪساض غ-دُونيت-اد عولا ليخرت.»

بيبي-اس-ومسيڪل: «امن-وڪان س-ربي ا-خالتي، تصبرت.» تيني-اس: «وا-يوي، وان  
 عيواليون-ان، مناوت-توال ا-يسن-سفلدغ، والايني زوند ايور اد-گان عي-يان عيفتون  
 غ-تيلاس. ايور، ار-يتزايد ار-يتناقاس، ار-يتيمغور ار-يتيمڙي، ار-د-يتاشڪي ار-يتيدو،  
 عور-يسين عيس-را-ت-يسلڪم نيغد عوهو. نڙوڙض ا-نسفلد عي-ڪرا ن-واوال عيزگان زوند  
 تافوڪت. تلا بدّا س-تيفاوت-نس عيدومن، تمون ديدون، تسروح-گن ار تلڪم غ-يلي ترام.  
 احينو، ما-يڙضارن ا-زغ-گينغ-يسيتي تيكساض عولا شڪ؟ عولا ما-يڙضارن ا-يغ-يسنتال  
 زغ-تنوڪموت عولا تاغوفت؟ نيغد ما-يڙضارن ا-يغ-يشڪشم س-لامان غ-دُونيت-اد عولا  
 ليخرت؟» تيني-اس تازويت: «نكي د-گما، نفوغ-د ا-نسيڪل عيغ-نوبا ڪرا ن-يان عيسن  
 ڪولو مايا. عيغ-ت-نوبا را-د-نووري ناوي-ام-د لاخبار.» تيني-اسن-يلما-تفقيرت: «زايدات  
 ا-تاروا-نو، تسيڪلم س-يان عيڙضارن ا-يغ-يشڪشم س-لامان.»

بيبي-اس-ومسيڪل: «واخا ا-خالتي. نيس-ور-يلي ما-غ-ا-يم-تعاون، عور-تا-ندي؟» نڪرن  
 غاڪودان ار-اس-سنگدان تاحشوشت-نس، سمن عولا تاغاراست لي-يتاوين س-تالعينت.  
 اسين-د ڪرا ن-يڙران، عادلن-اس تاڪات. سون-اس عيلما عيخف، ڪملن  
 ف-وغاراس-نسن.

فتون ایلّیغ لکمن یان-واسیف. افن-ین مدّن غ-تامان-نس، عور-ژضاران اد-بّین اسیف اشکو  
 ینکّی-د، یاوی لقنضرت. اشکین-د کرا ن-مدّن، اوین-د ینکّجدا د-یزاکارن، اسن-تن  
 جّورن-تن ایلّیغ لکمن تاسکّا-یان یاظنی، سیکلن-تن س-یژران مقورین. لیغ زکّان  
 لقنضرت، بدون مدّن ار-فلاس-زراین. لیغ فلاس ینفتا-ومسیکّل ت-تازویت، سفلدن  
 ینی-تغییت غ-تغوردین-نسن، کلبن س-اتمنادن یات-تمغارت، تفرتل-ن زغ-لقنضرت،  
 یاوی-ت-ونکّای. ار-کولّو-سغویون مدّن-ان ار-سرس-تازالن، والاینی تجهدن-وامان اوین-ت،  
 عور-ژضاران است-لکمن. ینی غایان غ-تاسا ن-ومسیکّل ینولا تازویت. ینی-اس  
 ینی-کّماس: «ما-یسنّ ماناکو ا-را-ن-یغر ربّی ینی-ان کیتّغ؟» ینی-اس «ینولا ما-یسنّ  
 ما-را-یغ-یللی غ-دار ربّی غ-تاساعت-ان؟» توفاتن-د تینووشی سور لّان غ-تاکانت، نسن  
 کّیس ار صّباح.

## 6. اکساب

زیک صّباح امژن اغاراس ایلّیغ فوغن تاکانت، اون غ-کّر ینجاریفن. فتون ایلّیغ-ن-وفان  
 یات-تووروت ن-وولّی تکسا غ-کرا ن-یساکان. ژرن-ین یات-تخیامت ن-شعار ینضلان،  
 ییلی یان-وغیبول غ-تامان-نس، ینکّاور-کّیس-وکساب ت-تاروا-نس ار-شتان. غیر  
 تّرا-تن-تمغارت ن-وکساب، تنکر تسمارحبا سرسن ادیدسن-درون غ-وروکو. تسقسا-تن  
 ینلما مانی-د-کان ینولا مانی ران. ینی-اسن-ومسیکّل ف-ومودّو-نسن نّتا ت-تازویت،  
 ینعاود-اسن ف-ماد-مناکّارن ینولا ماد-ژران. ینی-اسن: «کراض-اد-مو-ور-نوفی اسافار.  
 بو-یکشوضن ینا-یاغ «ینلا یان ینخلق دّونیت تفولکی». بو-وخرب ینا-یاغ «ینجرا کرا  
 ینی-دّونیت ینسّخصر افولکی-نس». تافقیرت نّتا-یاغ «عور-سور-یلّی لامان غ-دّونیت»، ینولا  
 لیخرت عور-تسین ینس-را-ن-کّیس-تاف لامان.»

ینی-اس-وکساب: «نژورض کولیاغ لامان، والاینی عور-رات-ناف غ-دّونیت والا لیخرت،  
 اشکو عور-نسنّ مامنک ا-نترضو ربّی.» ینی-اس-ومسیکّل: «تافقیرت-ان تیکلّینت  
 تکسوز ا-ورت-یقبل ربّی، اشکو عور-تّضار ا-تسکار ما-ست-ید-یقان غ-دین.»

تساؤل-د-تمغارت ن-وکساب تینی-اس: «ءولا نكُني ءور-ا-نسكار ما-بغ-د-يقان.»  
 بیینی-ورگاز-نس: «ها-یاغ-غ-لخلا. ءور-ا-نسفلید ءی-صوهور والا تینووشی ما-غ-ا-نترالا.  
 ءور-ا-نتیسان لا ءیرن والا ءوسان ن-وژوم. ءور-دارنغ ءیمزلاض ما-می-ناکا. ءور-نسین  
 مامنک ا-نطوضا، یاگوک فلانغ لا لحيج ءولا طالب. ءور-نسین ءیوالیون دا-اقران  
 غ-تمزگیدا، والا نفهم لمعنا-نسن. ما-را-بغ-بیلی نكُني؟ مامنک ا-را-نیژضار ا-نامثر رُضا  
 ن-رُبی؟ ءولا مامنک ا-را-بیلی غ-لامان-نس.»

ءیسقسا-ت-ومسیکل: «ءیس-ور-یلی کران-مامنک یاضنی ما-س-ا-ترضوم رُبی، تافم لامان  
 غ-دارس؟» تساؤل-د-تمغارت ن-وکساب تینی: «غیر ویلی ءیتیدون س-تمزگیدا ا-را-یاف  
 رُضا غ-دار رُبی، زدغن غ-لامان.» ءیمناد-گیسن-وکساب بیینی-اسن: «ها-یات لقیست،  
 نان-ت ویلی زرینین. ءیگا-تین یان-وگلید ءیعرض ءی-کران-مدن س-لقصر اءیدس-شن  
 ءیمنیسی. کشمن س-دار-وگلید، ار-اس-تبنداقن ار-کنون ار اکال، حشمن باهرا  
 غ-لگڈام-نس. ءور-ا-تکماین ءولا دا-سوفوسن ءولا ژضارن اد-الن الن-نسن غ-تسمگین  
 لقصر ءولا راد-اجن اوال لعیب ا-یک ءینفورن-نسن. ءیبان غ-مدن ان ءیس-فولکین باهرا،  
 ءیفرح-سرسن-وگلید. ءیما نتان ءیگا باب لعافل، ءیسن بنادم مامنک ا-یگا. لیغ دان  
 ءینبگیون-ان، یازن ءیسمگان-نس ا-فلاس-سقساں ادجارن-نسن مامنک اد-تصرافن  
 غ-سوق، سقساں تیمغارین-نسن مامنک اد-تصرافن ءولا غ-تگمی. وورین-د-ءیلما  
 س-دار-وگلید ءینین-اس «مدن-ان ار-کاتن تیمغارین-نسن، ار-تغشون غ-سوق، ار-ترین  
 د-وادجارن-نسن، کود یان ار-یگات ف-یخف-نس. ءور-ستهلان اد-کن ءیمدوگال-نک.»  
 ءیجاوب-د-وگلید «ا-ور-سار-تن-ژرغ غ-لقصر-ینو.»»

ءیزاید-وکساب بیینی-اسن: «یان ءیلان غ-تمزگیدا، ار-تبنداق ءی-وگلید ءیمقورن،  
 ار-یسکار کولو ما-می-یژضار ا-یسباین ءیخف-نس ءیس-یفولکی. والاینی غاکود نا-یفوغ  
 زغ-تمزگیدا، غاکودان ا-رات-یتارم-وگلید بیسان ما-گیس-یلان. ما-تنام؟ تاژلیت د-وژوم  
 لی-ور-یتاران بنادم ا-یسکار افولکی د-ایت-تگمی-نس، مالفایت گیسن ءیلان؟ یان  
 ءور-یسکارن س-لحق غ-سوق، مامنک ا-را-یرضو رُبی غ-تمزگیدا؟ غایان ا-ف-ور-یقاما  
 لامان غ-دُونیت، اشکو ءور-سور-سین مدن مامنک اد-ترضون رُبی س-لحق ءولا لمعقول



ن-ينگراتسن، ٻيرين ا-تي-ترضون س-واوال د-جوع. ميورن غايد سڪارن. ٻور-ا-سيگيلن  
س-ڪرا ٻيگان لڳديد.»

ٻيمناد-گيسن-ومسيگل ٻيني: «ماياد، ٻور-يري ا-ٻي-يتياوفهام. ژرايت، ٻيس-ٻور-تعرًا نوقرت  
دار ڪولو مدن، ٻيگوت-واتيگ-نس؟ والائيني، ما-مي-تصلح نوقرت؟ نيس-ٻور-ت-يوف  
لموس لهنت، ٻيصلح ا-سرس-تبيت تيرڪمت. ٻولا تاساروت ن-ووزال، تصلح  
ا-سرس-ترزمت تيفلوت. ٻولا اغنجا ن-وڪشوض، ٻيصلح ا-د-سرس-تسراست تاحريرت  
نيغد تاگلا غ-تمڪيلين. صلحن ڪولوتن ٻي-بنادم. ٻيما تالخورصت ن-نوقرت،  
ما-را-سرس-يسڪر يان؟ ٻولا تانبات ن-نوقرت، مالفايت گيس ٻيلان؟ ٻور-سور-سبين مدن  
ما-ٻيصلحن زغ-ما-ٻور-ٻيصلحن.» ٻيني-اس-وڪساب: «ميورن ا-د-ڪولو-سڪارن زوند ويياض،  
مڪلي سڪارن ٻيمزوروا-نسن. ا-ر-ڪولو-تامزن لعادات ن-زمان بلا دا-سوينگيمن مالفايت  
گيسنت ٻيلان.»

توت-تمغارت س-ونفوس تيني: «ڪولو ماياد ٻيگا ما-غ-ا-يتعجاب يان. نيس-ٻور-ٻيلي ڪرا  
ن-مامنڪ ياضني ما-س-ا-نتافا رضا غ-دار ربي؟» ٻيزايد-ورگاز-نس ٻيني: «تاموگائيت  
نا-ن-تقنت غ-يگر، دا-تلولي ا-ر-تاظر اڪال ارد ٻور-سور-گيس-يقاما ما-تشتا. ا-ر-تلدي باهرا،  
تيري ا-تبي ٻيزيڪر والا ا-تسوكف اگوس، باش ا-تلڪم توگا لڳديد. غمڪاد ا-يگا بنادم،  
ٻولا نتان، اشڪو ا-ٻييري ا-يسلاڪا ڪولو تاگلدت ن-ربي دا-يمقورن. والائيني ٻيتياوڪراف،  
ٻيڪساض زغ-يواليون ن-مدن.»

ٻيني-اس-ومسيگل: «تتيت ا-خالي نيس-اغ-ٻيخصا ا-نسڪار اڦولڪي ٻي-نگراتنغ، والائيني  
مامنڪ ا-س-را-نيسان اڦولڪي؟ اشڪو ٻيلا ما-يشوان ٻي-ڪرا، ٻيخشن ٻي-ويياض، ٻيلي  
ما-ٻيخشن ٻي-ڪرا ٻيشوو ٻي-ويياض.» تيني-اس-تمغارت ن-وڪساب: «ٻور-ٻهيمغ  
ما-تريت ا-تريت ا-امسيگل.» ٻيني-اس: «ها-نڪي د-وولتما دارنغ يات تاتفاحت،  
ٻيغ-ت-ومرغ نڪي ٻي-ٻيخف-ينو، هاتي ٻيڦولڪي-ٻي والائيني ٻور-ٻيڦولڪي ٻي-وولتما.  
ٻيغ-ت-ٻيغ فڪغ-اس مناص، هاتي سناقسغ زغ-مايلي داري ٻيڦولڪين، سڪرغ-اس نتات  
مايلي دارس ٻيڦولڪين. نيس-نرزار ا-ٻي اڦولڪي نبضوت ٻي-نگراتنغ؟ ٻيغ-يدا يان  
س-سوق ٻيسغ ڪرا ٻيغلا س-وگار ن-واتيگ لي-يسوا، هاتي ٻيخشن-اس، والائيني ٻيڦولڪي

ءى-والى-اس-ت-يزنزان. عىغ-يسفلد-ومكسا ءى-لادان عىفل تاوروت تكسا ءىدو  
س-تمزكىدا، هاتى ءىفولكى ميان غ-والن ن-مدن، والىنى ءىخشن ءى-باب ن-ووئى.  
ءور-ىرى-اىى-تىئاوفهام، مامنك-را-نىژضار-انىسان ما-ىفولكىن زغ-ما-ءىخشن؟»

ءىزىد-ومسىكل بىنى-اس: «دارى يان-وسقسى ياضنى. عىغ-سكرغ كرا س-نىت ءىصفان  
افىغ-ت-ىن تىكرا ءىخشن ءى-وىياض، ما-س-راد-سفلكىغ غالىلى سكرغ ءىخشن؟ مامنك  
ا-را-ت-سنگداغ غ-دار مدن ءولا غ-دار رىى؟ زوند، عىغ-زلالىغ س-وژرو ءى-ووئى  
ياشك-ىن غ-كرا ن-وحشمى ءىمت، ما-راد-سكرغ باش ا-ىى-صامحن اىت-دارس؟ ءولا  
ما-راد-سكرغ باش ا-ىى-ىصامحن رىى؟ عىغ-ژىغ د-كرا ن-يان ءوتغ-ت، افغ-ن تىكرا نىزد  
نتان ا-دار لىق، ما-راد-سكرغ افاد ا-ىى-ىصامحن؟ ما-راد-سكرغ ا-ىى-ىصامحن رىى؟»

كاورن دار-وكساب تام-ووستان. ار-ىتفتال-ومسىكل تىزاكارىن ن-تزنىرت، ار-سرسنت-ىتعدادال  
تورژىن ءى-تاروا. ءىما تازووت ار-تكئو تىملسا نا-بىن ن-تاروا س-تاسمى د-ىفلى  
لى-اس-ىفكا بو-ىكشوضن. ءىفل-تن-ىلما-ومسىكل ت-تازووت، كملن ف-ومودو-نسن،  
ءور-تون ءىسقسىتن ن-وكساب ت-تمغارت-نس.

## 7. امخار

فتون اىلىغ تلکم توژونط ن-واس، س-مناكارن سىن ءىفرخان غلىن-د زغ-ىكران، كئ-د  
ءىمودار ف-تغراض-نسن. سلنم فلاسن مون دىدسن غ-وغاراس.

ساولن ءىمىك ف-تىوكا ءولا ف-تمكرا، ءىسقسا-تن-ىلما-ومسىكل: «ماد-كان  
ءىسماون-نون؟» ءىساول-د يان كىسن بىنى-اس: «نكى كىغ حامو بو-تامارت. غواد  
ار-اس-نىنى حامو امخار.» ءىتعبب-ومسىكل بىنى-اسن: «بو-تامارت، سئغ ماخ اىلىغ  
ا-ىك-اقران غمكان اشكو تسكرت امار، ءىما كىى-اد مى تىنن امخار، ماخ اىلىغ  
ا-ىك-اقران س-ىسم-اد؟» بىنى-اس: «ا-ودى، يات-تفولوست كاد-ىوئغ ءى-ومغار،  
افن-ت-ىن غ-تكمى-نو.» ءىتعبب-ومسىكل ءىسقسا-ت: «منشك اىد-س-ىجرا ماىاد؟»

بيني-اس: «سين عيسگاسن اباد. زغ-غاسان عور-جي-سور-وکرغ کرا.»  
 بيبي-اس-ومسيگل: «ايوا، عيبان فلاک نيس-ور-سور-تکيت امخار.» عيساول-د-بو-تامارت:  
 «يان عيگان بو-توملا، ديما يوي-تنت.»

عيسوانگم-ومسيگل بيبي-اس: «کيي تکيت بو-تامارت. لوقت نا-تريت، را-تکست  
 تامارت، تبدلت سيفت-نک. نيس-ور-يژضار-ومداکل-نک ا-بیدل عولا نتان؟» بيبي-اس  
 بو-تامارت: «تامارت ار-دي-تمغاي غ-برا ن-بنادم، عيما تامخارت ار-دي-تکا اکنس  
 ن-بنادم.» بيبي-اس-ومسيگل: «نيس-ور-يژضار يان ا-بیدل ما-يلان غ-وکنس-نس؟»  
 عيسوال-د-بو-تامارت بيبي-اس: «غواد، تکشم-کيس-تمخارت غ-ليغ سور عيمزي.  
 عيسوم-ت زغ-لحليب ن-يناس، عيش-ت زغ-يفادن ن-باباس. احشمي عيمزين، زوند  
 اکشوض ن-وليلي ا-يگا. عيغ-سور-يزکزاو، زر را-سيس-تسکرت ايننا تريت، والايي  
 عيغ-يقور، تاکات کا-مي-يگا.»

عیکلب-ومسيگل غ-ومخار عيسقسا-ت: «عيس-ور-اک-يصامح-ومغار؟» بيبي-اس:  
 «عيصامح-يي ليغ-اس-د-رورغ تافولوست-نس، والايي عور-يتو غايلي سکرغ. غاکود  
 نا-ديدس-مناگارغ ار-کيکي-يضمما ار-يي-يرگم، نتا عولا تاروا-نس عولا ايت-دارس  
 کولوتن.» بيبي-اس-ومسيگل: «والايي عيغ-تفکيت لعهد اور-سار-تاسيت يات،  
 نيس-ور-را-ک-اجن ا-تبدوت غ-تالوحت عيصفان؟ عيس-ور-را-تافت مامنک ا-تسکرت  
 سلامت غ-کراک د-مدن-ان؟» عيرار-اس: «عوهو، اشکو ار-بدا-کيکي-تشکون، د-ايننا  
 عيتياکارن غ-ودوار، ار-ت-يد-فلا-سراسن.» عيتعجب-ومسيگل غ-واوال-اد.

عيزايد-ومخار بيبي-اس: «ا-ودّي، ما-را-يک-ينيغ؟ مدن-اد زوند تاتفاحت اد-گان.  
 عيغ-تي-تريت زغ-برا تفولکي، والايي زغ-واوکنس ترکم. نکي عيبان-د-لعيب-ينو حايئا،  
 عيما نتني سن مامنک اد-سنتالن لعيب لي-کيسن-يلان. ار-تسکارن عيخف-نسن، ار-تينين،  
 نتني فولکين. والايي سنغ نيس-ا-سکارن عوکار ن-ماد-سکرغ نکي. غير نتني  
 دات-سکارن غ-تنتلا، عور-ا-تن-ژران مدن.» بيبي-اس-ومسيگل: «تُعزانت ا-کما،  
 عور-را-يتحشام يان ف-ما-يسکر عيغ-ور-يلي ما-ت-يژران.»

بيني-ومخار: «هاتي غ-وزمز ن-تگرست ار-يطار-ودفل، ار-يدال زبل دا-يلان ف-واكال. والايي غاكود نا-دي-تغلي تافوكت، ار-تسفسسي ادفل ار-دي-تسبايان زبل سور عيلا. عيكا-ودفل زوند يان عيتنين «فولكيغ نكي، عور-كيشي لعيب». ار-يسكيركيس اشكو ار-يسنتال عيركان لي-يلان غ-وول-نس عولا لعائل-نس. را-تن-يسباين ربي غ-واس لحساب غمكلي-دي-تسبايان تافوكت لعيب لي-يسنتال-ودفل.» بيني بو-تامارت: «عيكوت ما-يتنين عيس-يفولكي، والايي لانت-سور-كيس-تكركاس ار-يتغضار ار-يتغشو. ييلي سور كيس طمع ار-يتيري ما-يگان وين-وادجار-نس. عيلين سور كيس عيرين ار-يتري د-وانا-ت-يضاضان. عيلنت سور كيس شاهوات ييري ا-يمون ت-تياض. ييلي سور كيس لكبير ار-يتعدا ف-ايتماس والا ويلى-د-يخدم. ييلي سور كيس لعكز عور-ا-يسكار س-واوال-نس. نس كولوغ مامك ا-نكا.» بيني-اس-ومسيكل: «تغزانت ا-كما. نس ما-يركسن غ-وول ن-بنادم. والايي عور-نري ا-نصامح عي-يان عيسكرن ما-يخشن. نرا ا-نسباين عيخف-نغ نيس-نوف ويياض. ار-كولو-نسنتال ما-كينغ-يخشن. والايي مامك ا-را-يضرار يان ا-يسغوس عيخف-نس زغ-لعيب عيتلن؟»

بيني-اسن بو-تامارت: «عيشقا باهرا. زر تاموگات، ار-ت-زيوزن-بيزان. ار-تن-تسيلف س-تمغيلت-نس، ار-تكات س-يضرار-نس، ار-تقن الن-نس، ار-تسموسو اكايو-نس، والايي عور-تضرار ا-تسمسر عيزان-لي. كابلن ت-بدا، ار-ت-سكلكيشن ار-اس-ت-سطيارن كرايگات اس. غمکان اد-زرارين-ووسان ن-تموگات ارد تمت. غمکان ا-يكا بنادم عولا نتا. ار-د-سرس-تاشكين عيوليون اخشن عولا عيسوپنكيمن لعيب زغ-كرايگات تاسكا، ار-ت-زيوزن ار-اس-ت-سطيارن ار-تي-تجورون ارد-ت-جلون. د-نتان، عور-يفرح عور-يلي د-يخف-نس. ار-يسيلف غايك لي-تسيلف-تموگات، ار-يتيري ا-يسمسر كولو غايي يخشن. ار-يتزالا ار-يتازوم، ار-ياقرا ار-يحصو ار-ياگا صاداقا، والايي عور-يضرار ا-يساكوغ لخشان ن-دونيت لي-يتراسن غ-دات-نس. غمکان ا-يتزايد ارد عيمت. تاموگات، عور-ا-كشمن-بيزان س-واكسن-نس ارد تمت، عيما بنادم ار-يكشم ما-يخشن س-واوكسن-نس سور عيدر.»

بيني-ومخار: «ا-يغ-ينجا ربي. اشكو نكني ن-بنادم عور-تضرار ا-نانف عي-لخشان ن-دونيت-اد، عولا نس مامك ا-نسيتي ما-كينغ-يخشن.» عيسماقل-كيس بو-تامارت

بيني-اس: «تُغزانت ا-كُما. اشكو ننا، عور-يُضار يان يُخشن ا-يوورِي عيفولكي غ-دار ربي عولا غ-دار بنادم.» عيساول-د-يلما-ومسيكل بيني-اسن: «كولو مايا د-ار-يسنگارا يان د-وادجار-نس، عيسنگارا-ت د-لعافل-نس، عيسنگارا-ت عولا د-ربي. امار يوفان سلامت غ-گر مدن عولا لحنانت دا-يسمونون وينا بضانين.» فسان كولوتن ار-سوينگيمن، بيني عيلما بو-تامارت: «سفلدغ عيس-يلا يان-ودوار غ-تسگا-يان ن-يداران-ان، ار-اسن-تينين ايت-سلامت. حاقان راد-يسان مامنك ا-نسكار سلامت عي-نگراتنغ.»

## 8. امزبل

عيس-ومسيكل ت-تازويت غ-يضر-ان د-سين عيد-حامو. نكرن-د زيڪ صباح، امژن-داغ اغاراس. ترغا لوقت، عور-يلاي مانيع ا-سمولون. وورين نتني اينغ-تن عيريفي باهرا. فتون ايلينغ-ن-ژران يات-تكمي. فرحن اشكو سوانگمن عيس-را-ن-كيس-افن مايلاي حتاجان. اكمورن-ين سرس س-سفلدن عي-وكوم ن-ووزال غ-واكس-نس. ار-ياقرا-ومسيكل س-جهد عور-اس-يسفلد يان. ار-تسزوقور عولا تازويت عور-د-يوشكي يان. دحين عيفلو كشم، افن-ين سين عيركازن ار-تنغادن عوزال. عيلاس-وانوض، ترغ لعافيت س-ترغي عيحران، ار-تايالان عيمدوگيكن. كشم بيدن ار-تمنادن غ-يمزبلن. تغاشا تازويت س-يريفي. بيني كُماس د-يخف-نس: «تيكمي-اد تگا زوند ما-تينين ف-تكمي ليخرت. ار-ناقرا غ-يمي-نس عور-اغ-يسفلد يان، ار-نسزوقور عور-اغ-يرزيم يان. عيما غيلاد غ-د-نكشم، ناف عيخفاون-نغ غ-واماس ن-تيلاس د-لعافيت عيجدرن، ار-كاتن ار-تكومن زوند عيغ-نكشم س-لعذاب لقبر.»

سرسن عيمزبلن عيماسن-نسن، سيلفن-اس-د عيلما ا-ياوي عولتماس ا-ست-يسنگاور ف-يان-وسكدل، اوين-اسن-د اد-سون. ليغ سونفان عيعاود-اسن-ومسيكل ف-ومودو-نسن عولا تامارا ن-وغاراس. عيساول-د-ومزبل بيني: «بنادم زوند تاقاريت ا-يگا. دا-تحنكوري س-تسگا-ياد عولا ختا، ار-تيدو زغ-تقرايت س-طايا. يان سور عيدرن عيرا-تيدو ار-د-يتاشكي، اشكو راحت عور-تلي غ-دونيت-اد.» عيساول-د كُماس عولا نتا بيني: «نان ويلاي زرئينن: لحد ن-وحنكوري تالات. ها-تاقاريت دارس سنات-تسكيو. تانا-ف-تضر

ا-ف-را-تغاما. غمکان ا-یگا بنادم ءولا نئا. ءیسکر سین-وودماون، وانا-ف-ن-یضر  
ا-ف-را-ن-یقاما. ءیغ-یکمّل اغاراس-نس ءیلکم-ن اسّ لّحساب، را-ن-یاف ءیخف-نس اما  
غ-لجنتّ اما غ-جهنّاما، د-غین ا-غ-را-یقاما.»

ءیسقسا-تن-ومسیگلّ: «ءیس-تسنم ما-را-یجرو غ-واسّ لّحساب؟» یینی-اس-ومزیل:  
«ار-تینین مدّن را-نبیدّ کولو غ-واسّ لّحساب. غاکودان کود یان را-یحصو تالّوحت-نس.  
وانا ءیسکرن لّخیر را-ت-یحصو. وانا ءیسکرن لعار را-ت-یحصو. غاکودان رادّ-نکرن  
ویلّی-غ-تسکرت لعار، را-دیک-نحاسابن ف-غایلی-اسن-تسکرت. را-یک-عبّر ن غ-لمیزان  
دا-ور-یسینّ لغشّ. لموجریمین رادّون س-جهنّاما، ءیمّا ویلّی سکرین کولو ما-یترضون ربّی  
رادّون س-لجنتّ.» ءیسوانگم-ومسیگلّ د-یخف-نس یینی-اس: «والاینی مانوا کینغ  
ءیسکرن کولو ما-یترضون ربّی؟» ءیسماقل-د-کس-ومزیل یینی-اس: «غمکاد اد-تینین  
مدّن. حاقان ءور-یلّی یان کینغ ءیسکرن کولو ما-یترضون ربّی.» ءیسقسا-ت-ومسیگلّ:  
«ءیغ-یگا غمکان، ما-را-یغ-یجرو نکئی-اد ءیکان دو-وکراچ؟» یینی-اس: «ا-ودّی،  
انضالب ربّی اد-اغ-یرحم.» ءیسقسا-ت-داغ: «ءیس-تسنت نیس-را-یغ-یرحم کولواغ،  
نیغد غیر کرا کینغ؟» یینی-اس: «ما-را-یک-ینغ؟ نتان ا-یسن.» یینی-اس-ومسیگلّ:  
«ءور-یی-یسهنّا-واوال-اد. نیس-ور-نژضار ا-نیسان ءیزد س-لجنتّ ا-س-را-ندو نیغد س-یلّی  
یاضنی؟» یینی-اس: «ا-ودّی، وانا ءیکسوضن زغ-لعداد، ار-ن-یترجو غ-رحمت-نس.»

یینی-اسن کّماس ن-ومزیل: «ار-تینین مدّن، یان-وسکیر ءیشوان ءیرا-عبّر میا ن-وسکیر  
یُخشنّ. ءیحصّا یان ا-یسکار لّحاسانات ما-س-ا-یتعمّر لمیزان.» ءیسماقل کس کّماس  
یینی-اس: «ءیس-تژضارت کئی ا-تبتّ غ-لکدّام ن-ربّی، تعبّرت کولو ما-تسکرت یُخشن  
ءولا کولو ما-تسکرت ءیفولکی؟ نیس-ور-را-تحشمت ف-دّنوب-نک ءولا ف-لعار  
لّی-تسکرت؟»

ءیزاید یینی: «ها-یات لقیست، نان-تّ ویلّی زرینین. ءیکّا-تین یان-وکلّید یومژ دین باهرا؟  
ءور-دارس-تحلّا-تقیّی لّحلّوف. ییلی دارس یان-وطباخ غ-لقصر. اسّ ف-واسّ  
ار-اس-یجّوجاد تیرمت-نس. یان-واسّ ءینصب-اس-ن یان-طّاجین ءیک-ن کس ءیمیکّ  
ن-تقیّی ن-وموگای د-یمیکّ ن-تین-وحولّی د-یمیکّ ن-تین لّحلّوف. ءیک-اس-ن لّقوام-نس

زغ-تيسنت ار لُخُصرت، ٻيروي-ن ڪوڻو ميان ايلڻغ ٻينوا، ٻيفڪ اڙو ٻيفولڪين ايلڻغ ٻيرڙم  
 شاهيا ن-ومشُو ٻي-وگڻيد. ياوي-اس-ت-يد، ٻيسقسا-ت-وگڻيد «ٻاجين ٻيفولڪين اياڊ.  
 ما-ن-ڊاغ-گيس-تگيت؟» ٻيني-اس: «ٻيمڪ ن-تفيسي ن-وموگاي ڊ-يمڪ ن-ٽين-وحوڻي  
 ڊ-يمڪ ن-ٽين لحوڻو.» ٻينڪر-وگڻيد غاڪوڊان، ٻيزگ فلاس، ٻيغضب باهرا. ٻيني-اس  
 «ٻيس-تغالت ا-واش نيزد تفيسي ن-وموگاي ت-ٽين-وحوڻي ا-را-يسحلان ٽين لحوڻو؟  
 ٻوهو، تفيسي-يان لحوڻو ا-يسحرمن ٻاجين ڪوڻو.» ٻيني ٻيلما ٻي-يسمگان-نس:  
 «ڪرفايت لڪافر-ڊ، ٽيم-اس ٻيخف، تلوح-ت-ين غ-وسراف-ان ٻيلاس، نٿا ٻولا  
 ٻاجين-نس. اشڪو ٻيسرس-ڊ ما-يحرمن غ-لگڏام-ينو. ٻور-اس-يگي اٻلا لموت.»  
 ٻيزايد-ومزيل ٻيني: «غمڪان ا-را-ٻيلي ٻي-واٿا-ن-ٻيڏن غ-لگڏام ن-رٻي ٻيسرس-ن  
 ما-يشوان ٻيسخالط-ط س-ما-ٻيخشن. ما-را-ٻيس-ٻيني رٻي غ-تاسعات-ان؟ ٻيرا-ٻيس-ٻيني:  
 «لوحات-ن واش-ان غ-ورواس، اشڪو ٻيسرس-ڊ لحوڻو غ-لگڏام-ينو. ٻور-اس-يگي اٻلا  
 نار.» را-ٻيون-ٻينغ، ٻيسڪين شوانين ٻور-ٻضارن اڊ-گيسن ٻيسڪين اُخشنين. اشڪو  
 ٻيسڪين اُخشنين، نٿي ا-يسحرمن بناڊم ڪوڻو. غايلي-ن-ٻيسراس يان غ-وٻرڻو  
 اڊ-ٻيتاسي.»

ٻيني-اس-ومسيگل: «ا-خالي، ٻيواليون-اڊ-نڪ سبيڏن ازار ن-ٻيخف-ينو. ٻيس-ور-نڙڊار  
 ا-زغ-گينغ-نسيٽي ما-ٻيغ-ٻيسحرمن ٻولا ما-ٻيغ-ٻيسحشامن، ٻور-تا-نڪشيم س-ڊار رٻي؟  
 ٻيس-ور-نڙڙار ا-نسغوس ٻيخف-نغ زغ-ڏنوب، ٻور-تا-ٽن-يگي غ-لميزان؟» ٻيني-ومزيل:  
 «امار يوفان ا-ٻيسان يان ٻيس-را-ت-ٻيرحم رٻي. امار يوفان ا-نيزضار ا-نسڪار سلامت  
 غ-گراتغ ڊيدس، ٻور-تا-تلڪيم تاساعت لحوڪم؟» ٻوت-ومسيگل س-ونفوس-نس ٻيني:  
 «اسقسي-اڊ ا-ڪوڻو-يشقان غ-ٻيسقسيتن لي-مي-نسفلد غ-ووسان-اڊ؟» ٻيني-اس-ومزيل:  
 «زايڊات سول تاساوت، ار تروحم ايت-سلامت. ٻيغ-ور-ت-سِين نٿي، ٻور-را-ت-ٻيسان  
 يان.»

## 9. ایت-سلامت

زرین سین-ووسان غ-وغاراس، لکمن-ین ف-دکات ادوار ن-ایت-سلامت. افن-ین کرا ن-مدن کاورن جمعن غ-ومالو ن-یمی ن-یات-تحانوت، کود یان ییوی-د دیدس کرا ایرژان عولا کرا ایخصرن. یان دارس اولو ایرژان، یان دارس لمیدا ایکس-اس-وضار، یان دارس امادیر بلا افوس، یان ییوی-د لکورصا می تعوج رویضا. اینسالام-دیدسن-ومسیگل. اینماد-ن ایلمّا غ-وکنس ن-تحانوت ایر-ن یان-ورگاز ار-یسرام اکشوض.

سقسا-تن مدن-ان: «ایزد انجار ا-ترام؟ ایس-دارون کرا ایخصرن نیغد کرا ایرژان؟»  
ینی-اسن-ومسیگل: «کولو غید-نکا ووسان-اد نسفلد کس ای-ما-ایخصرن عولا ما-یرژان.  
ایس-یسن-ونجار-اد-نون مامنک ای-سنام تودرت ایعوچن؟ عولا مامنک ای-یتعادال لقلب ایرژان؟ عولا مامنک ای-یصلح دونیت ایخصرن؟» ساولن-د: «حاقان ایرضار.»

سول ا-ساوالن س-دی-توشکا یات-تفروخت، تکا ایلیس ن-ونجار. تیوی-د اتای ای-باباس. ایفوغ-د ننان، اینماد غ-ومسیگل د-وولتماس س-ومنید لفرح ینی-اسن: «رپی ای-یکابلن اغاراس ن-ویلی-ف-یرضا.» ینی-اسن: «توگوکت ازغ-دی-توشکام. مارحبا سرون. را-دارنغ-تافم راحت عولا سلامت.» یوصا ایلمّا ایلیس اتن-تاوی س-تکمی. لیغ فتان غ-ودوار ژرن تیمغارین ار-تاگمنت، عولا ایرگازن ار-قازن غ-یکران. سفلدن-اسن ار-کولو-تاسین لغا زوند لمالایکا. اور-جی-سفلدن ای-وان تالغات-ان.

تسروح-تن-تفروخت س-تکمی، کاورن غ-یات-تحانوت ایغزیفن. تاوی-اسن-د ایروکوتن ن-واتای د-یات-تنکولت ن-وغروم سور ایرغان. تسقسا-تن ماد-گان ایسماون-نسن، تینی-اسن: «نکی، ار-پی-تینن تامنت. بابا، ایسم-نس امارای. تکا لمعنا-نس یان ایترین لخیر کولو ای-مدن.» تلا غ-تحانوت-ان یات-تصویرا تیآکال غ-وغراب، ییلی کس یان-ومکسا. ایگ القاغ ف-تغراض-نس، لولین-اس ایلقاغن یاضنی. تسقسا-ت تازویت: «ما-یکا-ومکسا-یان؟» تمناد کس تامنت تینی-اس: «امکسا ایفولکین ایان. ایگابل ایلقاغن-نس غمکلی-اغ-یکابل-ونجام-نغ.» تسقسا-ت تازویت: «ما-یکان انجام-نون؟»



تفرح-تفروخت تيني-اس: «انجام، ايگات-ت والي ايچنجامن. عيغ-ن-يضر يان غ-وگضي رات-يد-يسغلي عور-تا-يموت. عيغ-ن-يضر يان غ-واسيف رات-يد-يامز عور-تا-ت-يوي.»

تيني-اس تازويت: «زايد تينيت-اغ ف-ومكسا-ياد ايگان انجام-نون.» تساؤل-د تامنت تيني-اسن: «والي ايكشم زغ-يمي ن-زريت، ايگا امكسا ن-وولي. اوال-نس اس-ا-سفلدنت-وولي، ار-ن-ياقرا س-تيلي گانين تينس، كرايگات يات س-يسم-نس. ار-تند-د-يسوفوغ س-برا، عيزوور-اسنت، صفورنت-ت-وولي-نس اشكو عوگزنت اوال-نس. عينا نتان «نكين ا-يگان امكسا عيفولكين. امكسا عيفولكين ا-يتمتان ف-وولي. عور-كبيغ زوند عيمكيري دا-يرگلن عيغ-يژرا عوشن، اشكو نتا عورد تينس اد-گانت. نكي كبيغ امكسا عيفولكين، عوجاد غ اد-متغ ف-سبيت-نسنت. داري وولي ياضي، عور-ا-دي-تموننت غ-زريت-اد. عيقان-يي-د ا-تند-د-سمنوغ عولا نتتي. راد-سفلدنت س-واوال-ينو، تيلي يات-تووروت ييلي يان-ومكسا.» تسماقل تامنت غ-تصويرا تيني-اسن: «ها-يان-واسر عيسقسا مدن: «ما-را-يسكر يان گيگون عيطافن ميا ن-يخف ن-وولي عيغ-اس-تجلا يات گيسنت؟ نس-ور-را-يفل تيلي گوتنين، عيدو ا-يسيگل س-تالي عيجلان. غاكود نا-ست-يوبا را-ست-يد-ياسي ف-تغراض-نس، عيروح-د تيگمي عيغ-د اي-وادجارن-نس بيني-اسن: اشكاد تفرحم ديدي، هاتي عوفيغ تاهرويت لي-يي-يجلان.»

تسوانگم تازويت تيني-اس: «عيفولكي-ومكسا-يان. زرايت وولي-نس مامنك اذارس-عزانت. حتا تالي-ن-يقامان غ-برا، عيغوغ ار-سرس-يسيگل.» بيني-ومسيگل: «دا-تنت-يتكبابال غ-بيض والا ازال، يوجاد ا-يفك عيخف-نس ار لموت والا عيلكم-تنت كرا لادا.» تيني-اسن تامنت: «غمكان ا-يسكار-ونجام-نغ. ار-د-ياقرا س-كرايگات يان كبيغ س-يسم-نس، ار-يسيگل س-وانا عيجلان. عيفكا عيخف-نس ف-سبيت-نغ باش ايغ-يشكشم س-زريت لامان. ميان ا-ف-ا-يس-نتيني «انجام-نغ.» فسنان كولوتن ار-سوينگيمن ف-مايد-اسن-تنا تامنت. تيني-اسن عيلما: «نكرائت مانيع ا-تگانم ار صباح نكمل ف-تجماعت-نغ.»

ليغ-د-فاقن زيگ صباح، افن-د تاروا گوتنين غ-توزونط ن-تگمي، ار-تلعابن ار-ضصان فرحن اي-نكراتسن. عيكشم-د-ونجار ياوي-د اتاي ت-تمكيت ن-وزگيف اي-يان.

بيني-اس-ومسيگل: «عيزر-يي لعجب ا-خالي اماراي، اشكو عور-جي-ثريغ زوند تاروا-ياد. عور-ا-تماغن عولا دا-تزين عولا دا-رگمن عي-نگراتسن، عور-دارسن-سفلدغ عي-گار اوال.»  
 عيهضر-ونجار بيني: «وا-سيدي ربي، عيمر لحمد-نك عيگنون، زغ-يلس ن-يحشماي  
 عولا ازان. تائيت ف-ايت-تاثيرت د-يميغ.» عيسقسا-تن عيلما ماني-د-گان عولا ماني ران.  
 عينن-اس ف-ويلي مناگارن غ-وغاراس، عاودن-اس ف-ما-ينا بو-يکشوضن د-بو-وخريب  
 ت-تفقيرت غ-تاگانت د-وکساب د-ومخار د-ومزيل. بيني-اس-ومسيگل: «مدن-ان، کود  
 يان د-مان تاغوفت يوسي ف-کرا ن-تغاوسيوين لي-ور-يرين ا-يس-تياوفهامنت.»

بيني-اس-وماراي: «عيني-يي ا-يوي ف-يسقسيتن-نسن؟ عيزم-ومسيگل بيني-اس:  
 «وا-خالي اماراي، بو-يکشوضن عينا «تبان-تحکيمت د-وفولکي ن-والي عيسکرن کولو  
 لمخلوقات ن-تاگانت، واليني عور-بيان عيس-يگابل دونيت نيغد عيفل-ت ا-ترايد  
 واحدوت.» بيني بو-وخريب «عيرش کولو ما-يلان غ-دونيت-اد، تيلي فلاس تاگات.»  
 تيني-تفقيرت «عور-يلي لامان غ-دونيت والا ليخرت.» بيني-وکساب «مامنک ا-راناف رضا  
 غ-دار ربي؟» عينا-ومخار «ما-را-يسکر يان يخنش ا-يووري عيفولکي؟» بيني-ومزيل  
 «عيس-يژضار يان ا-يسغوس عول-نس زغ-ما-ت-يسحشامن باش ا-ور-يیکساض زغ-واس  
 لحساب؟» عيزايد-يلما-ومسيگل عيسقسا-ت: «نيس-توفام، کوني ن-ايت-سلامت، مامنک  
 ا-را-يژضار يان ا-يسکر سلامت غ-گراس د-ربي، عولا غ-گراس د-ايت-ودوار، عولا  
 غ-گراس د-يخف-نس؟»

عيفرح-ونجار بيني: «شکرغ عي-ربي ف-تاساعت-اد غ-نمناگار، اشکو عيلا غ-واوال-نس  
 «را-تن-کغ غ-لامان لي-ژورضن.» مدن-ان کولوتن، عيرا ربي ا-يسن-يمل اغاراس  
 ن-سلامت.» عيسقسا-ت-داغ-ومسيگل: «مامنک ا-يگا-وغاراس-اد ن-سلامت، عولا مانيع  
 عيلا ا-ت-يامر يان؟» عيمناد-کيس-وماراي بيني: «غيلاد ا-اغ-تئين مدن «ايت-سلامت»،  
 واليني غايد عيزرين عورد سلامت ا-نسکار. اشکو عيگا-تين زمان ن-يفادن. ا-تماغن  
 عيمزوروا-نغ ت-تقبيلين ياضني، ا-اسن-تکسن کولو مادارسن-يلان.» بيني-اس-ومسيگل:  
 «ما-يوون-يجران ايليع تبدل غمکاد؟» بيني-اس: «يوشکا-د دارنغ يان، عيسکر سلامت  
 غ-گراغ د-ربي عولا غ-گراغ د-وادجارن-نغ عولا غ-گراغ د-يخف-نغ. عيسکر-اغ-يا-لعهده  
 لجديد. عيمل-اغ مامنک ا-نتحنو عي-نگراتنغ. عيمل-اغ مامنک ا-نسوينکيم غ-ما-راد-يرين

مدن ياضني، بلا دا-تتضالاب ءوڭار لّحق-نّغ ءولا دا-تتيري ما-ور-يگين وينغ. عيمل-اغ مامنك ا-تتبداد د-وانا عيضعفن، نشوش وانا عينغا لاژ، ندل وانا عيشا-وسميص. عيسمون كولو ما-تتيران غ-شّرع ءولا لانبيا غ-يان-واوال، عينا «سكارايت د-مدن غمكلي ترام ا-ت-ديدون-سكارن.»»

عزيزايد-وماراي بيني-اسن: «ڭاورايت دارنغ ءوسان-اد، را-يوون-ملغ كولو ما-يغ-د-يملا ربي.»» قامان غ-دارسن كرا ن-بيرن. امسيگل ار-يتمونو د-وماراي س-تحانوت. تازويت ار-تعاون اي-تامنت غ-تگمي. سفلدن دارسن ف-كولو ما-يسكار والي مي-تئين انجام-نسن. بيني-اسن-يلما-ومسيگل: «واي-ايتما، لخير عيگوتن ايد ڭينغ تسكرم. والايي عيخصا-ياغ اندو نووري س-دار ويللي-د-نوبا غ-وغاراس، غمكاد ارد نلکم دارنغ.»» ءور-تري تازويت ا-تووري، تيني-اس: «ءوهو، ءوفغ-د غايلي-س-ا-سيگيلغ غ-دار مدن-اد، ءور-ژضارغ ا-تن-فلغ.»» عيمناد-ڭيس-ومسيگل بيني-اس: «ءيلا فلاغ ا-يسن-ناوي مايد مي نسفلد، اشكو نفل-تن-ين كولو غ-تاغوفت ءولا شك.»» بيني عيلما اي-وماراي د-يليس: «ريغ ا-زغ-ڭيگون-ضالغ ما-يوگرن افولكي-اد ڭينغ تسكرم. نيس-تژضارم اديدنغ-تمونم تفسيم اي-مدن-ان زغ-يسكراف؟» بيني-اس-وماراي: «ا-نضال ب ربي ا-يغ-يمل ما-ڭينغ-يرا.»» عيقن الن-نس غاكودان، بيني غ-تزاليت-نس: «وا-ربي سيديتنغ، ار-ك-نتالغ اشكو تعمرت ءولاون-نغ س-سلامت-نك، تفكت-اغ-د سلامت اي-نكراتنغ، تفكت-اغ سلامت غ-ڭراغ ديك. مل-اغ-د غيلاد عيس-تريت ا-نمون د-ينبگيون-نغ عزانين، نسلکم اوال-نك اي-ويللي-تن-يسقسان غ-وغاراس. مل-اغ-د ما-ڭينغ-تريت، س-يسم ن-ونجام-نغ.»» عينين كولو ويياض: «امين.»» عيسماقل-ڭيسن-وماراي، عيقل عيميك بيني-اسن: «يان عيمون د-وغاراس-اد، ءور-يللي ما-را-ت-يسماس.» ڭاورايت ار ازگا نمون.»»

## 10. غ-دار-ومزيل

زيك صباغ فوغن ادوار ن-ايت-سلامت، وورين د-وغاراس-نسن. سين-ووسان اد-زرين غ-وغاراس. ليغ لكمن دار-ومزيل، شكشمن-تن س-تگمي، ڭاورن سرسن-اسن-د اتاي.

عِيعاود-اسن-ومسيكُل ف-مامنك اد-روحن دار ايت-سّلامت ييني-اسن: «ارگاز-اد عيگا اماراي، نتان د-يليس تامنت، سكرن كينغ افولكي غ-دارسن والا غيلاد غ-ديدنغ-مون.» ييني-اسن-ومزيل: «مارحبا س-وانا عيسكارن افولكي.»

عيساول-د-يلمّا-ومزيل ييني-اس عي-ومسيكُل: «نيس-ور-تعقلت ف-مايلي-ف-نساول غاسان، عولا مامنك ا-نسقسا عي-نكراتنغ ف-واس لّحساب؟» ييني-اس-ومسيكُل: «سقسا-تن، راد-يسان نتني.» ييني-اسن-ومزيل: «را-يوون-ينغ ما-يغ-يهولن. ما-را-ييلي عي-يان عور-يسكارن كولو ما-كيس-يرا ربي؟ عيس-ت-يد-يقان ا-بيد غ-واس لّحساب عيحصو تالوحت-نس؟ ما-را-يسكر عيغ-يسن عيس-دارس ما-ت-يسحشامن عولا ما-ت-يسحرامن؟ مايان ا-يغ-يهولن.» ييني-اس-وماراي: «اسقسي عيشقان اباد، اشكو يان عيشگان، عيقان-ت-يدا ا-بيكساض غ-واس لّحساب.» عيساول كُماس ن-ومزيل عولا نتان عيسقسا: «والايني نيس-ورد لحاسانات اس-ا-يتيژاي لميزان؟»

عيمناد-كيسن-وماراي ييني-اسن: «را-يوون-ينغ يات لقيست. ها-يان-وقفير، عيطاف تيگمي عيمقورن د-يگران گوتنين. عيزري كولو لعمر-نس ار-يزنزا ار-يساغ، ار-يسمونو لخير عي-يخف-نس. ار-يسوينگيم غير غ-ما-يس-يصلحن نتان. عور-اك-يسالا ا-ست-ياوي غ-تنوكموت لي-غ-ا-زرين ويياض، ار-يدال عودم-نس ف-وانا عيحتاجان عولا وانا عيهرشن. هاتي ايلغ يووسر، بحرا-د-ا-يسوينگيم غ-ليخرت، ييني د-يخف-نس «راد-سكراغ لحاسانات ما-س-ا-تعمارغ لميزان عور-تا-موتغ.» عيفوغ-وقفير-ان عيفك عي-يكوشامن د-بيوكاضن، عيفك عي-تمزگيدا عولا عيمزلاض.» عيمناد-كيسن-وماراي عيسقسا-تن: «ما-يوون-يبان؟ ما-را-ييلي عي-ورگاز-ان غ-لميزان ن-ربي؟ عيزري ستين ن-وسكاس ار-يتطراح د-يخف-نس، ييري ا-يزري يان-وسكاس ا-يسيفساس ف-يخف-نس. عيس-را-يسغ لبلاصت-نس غ-لجنت عيدومن س-صاداقا ن-يان-وسكاس عيگزلن؟ ها-ما-را-يس-ييني ربي غ-واس لّحساب «واي-انافال، نيس-تسوانگمت ا-تسمونت عي-يخف-نك غ-ليخرت عوگار ن-ما-يس-تسمونت غ-دونيت؟ جهنما اداري-تستهلات كيي والا كولو وانا عيتيرين غير عيخف-نس.»

فَسَّانِ كَوْلُوتِنِ ار-سوينگيمِن. عيساول-د-يلمَّا كُماَس ن-ومزِيلِ يِني: «والايِّي عيغ-ا-يسكار  
يان لحاسانات زغ-مژبي-نس، حاقان راد-يژاينت ف-دَنوب-نس.» عيرار-اس كُماَس:  
«عيس-يلا كينغ يان عيتحاسابن لحاسانات عولا دَنوب زغ-مژبي-نس باش ا-ييسان مانوا  
يوكرن؟» عيمناد كُيس كُماَس يِني-اس عيلمَّا: «والايِّي يان عيسكرن غير يان-وسكير  
عيفولكين، حاقان عيرات-يرحم ربي عيغ-يرا.» عيرار-اس: «ا-ودِّي، ما-را-يك-ينيغ؟  
ءور-نسين عيس-يرا نيغد ءوهو. اشكو يومر ربي ا-نيلي غ-رَجَا ت-تكساض. ار-نترجو  
رَحمت-نس ار-نتيكساض لعداب.» يِني-اس كُماَس: «حاقان عيرايغ-يرحم  
عيغ-سرس-نومن نيس-ور-يلي كرا ن-ربي ابلان نَتان.» يِني-اس: «ءولا شيطان يومن  
س-ربي، ييسان عيزد ربي يان ا-يكا، والايِّي وان ليمان-اد، مالفائت كُيس عيلان؟  
عيس-را-يامر شيطان رضا غ-دار ربي؟» يِني-اس كُماَس: «عيشقا، ءور-اغ-يقاما ابلان  
ا-نترجو نيس-را-يغ-يرحم.» عيساول عيلمَّا عي-وماراي عيسقسا-ت: «عيس-ور-يكي ربي  
ارحيم؟»

عيساول-د-وماراي يِني-اس: «عيكا ارحيم، والايِّي ءور-ا-يترحام كولو وانا عيفوغن  
زغ-واوال-نس. عيس-تسنت ما-يجران عي-باباتغ ادام؟ عينا-ياس ربي ا-ور-تشت زغ-لغت  
ن-تسغارت-ان عيلان غ-توژونط ن-تالعرصت.» والايِّي نَتان، اينكر عيشا زغ-كُيس.  
ما-يس-يجران غاكودان؟ عيسوفغ-ت ربي زغ-تالعرصت، عيسبيد لمالايكا غ-يمي  
ن-تالعرصت. عيقن اغاراس لي-يتاوين س-تالعرصت، اور-سار-سرس-يكشم ادام ءولا  
تامغارت-نس. واخا عيرا ادام ا-ن-ياقرا عي-ربي ار-ن-يسضوقور ف-يمي، ءور-يژضار ا-يكشم  
داغ س-لجنت. واخا دا-يسكار كولو ما-يگان افولكي، ايگ-ن تيقني ا-يرضو ربي كولو  
ما-يس-يقامان غ-دونيت، ءور-يژضار ا-يووري س-يلغ تين عيكا. ءور-ت-يوجي ربي  
ا-سور-يكشم س-لجنت. ادام، غير يات-توال ا-يفوغ زغ-واوال ن-ربي. يات لمعصيت  
كا-يسكر، س-اس-يكس ربي تالعرصت لي-غ-تين عيكا. ما-تسوينگم، نيس-ت-يرحم ربي  
نيغد ءوهو؟» يِني-اس-ومزِيلِ: «ا-ودِّي، عيعدب-ت ءور-ت-يرحم.» عيساول-د كُماَس  
ن-ومزِيلِ يِني: «عيغ-يكا غمكا، مامنك ا-را-تيلي رحمت ن-ربي عي-يان؟ اي-اماراي،  
عيس-تژضارت ا-يغ-ترژمت زغ-تموكريست-اد؟»

عيسماقل-گيسن-وماراي ييني: «يان عيفوغن زغ-واوال ن-رَبِّي، ما-يحتاجا؟» فسّان  
 كولوتن. «يان عور-يسكيرن ما-گيسن-يرا رَبِّي، ما-يحتاجا؟» سول فسّان. «يان ف-يلا  
 لحوکم ن-رَبِّي، ما-يحتاجا؟» ار-کولو-گيسن-تمنادن، عيساول-د-يلما-ومزبل ييني: «عيبان-يِي  
 نيس-يحتاجا يان عيتبدادن غ-گراس د-رَبِّي، ات-يگان د-يان عيکملن کولو ما-گيسن-يرا  
 رَبِّي. عيحتاجا يان عيژضارن افلاس-يصالب رَبِّي ات-يرحم.» ييني-اس-وماراي:  
 «سفلدايت، را-يوون-ينيغ يات لقيست.

«يگا-تين يان-ومغار عيفولکي. يان-واوال ادارس-يلان، دا-يتحکام س-لحق د-لمعقول.  
 ها-يان-واس عيفوغ-د يان-وحشمي، عيگمر عيگضاض س-جباد. عيسافض يات-تزروت، ترژ  
 تاجاجت ن-شرجم ن-ومغار. امژن-ت، شکشمن-ت س-دار-ومغار. ييکساض-باھرا-واراض  
 ار-يتريکيگي، عيضرن ف-واکال غ-لگدام-نس ييني-اس: «وا-سيدي، ا-يسغزيف رَبِّي  
 لعمر-نک.» عيسفسات-ومغار عيسقسا-ت: «عيزد کيي ا-يرژان تاجاجت-ان؟» ييني-اس  
 «وا-سيدي، اضو ا-يويون تازروت، نکي عور-ريغ ا-ست-رژغ.» ييني-اس-ومغار: «وانا عيرژان  
 تاجاجت ا-را-ست-يعادل.» ييني-اس: «وا-سيدي، صامح-يِي باھرا، تُگراژ-يِي ف-غايد  
 سکرغ.» ييني-اس-ومغار: «مامنک ا-س-را-ستي-تسنگادات؟» ييني-اس-وحشمي:  
 «وا-سيدي، عور-راد-رژغ طاياض.» ييني-اس-ومغار: «مامنک ا-را-ستي-تسنگادات؟»  
 ييني-اس-وحشمي: «ا-سيدي، راد-سکرغ کرا عيفولکين. راد-فوغ غيلا د فکغ  
 سنات-تنگوال عي-يوکاضن-ان عيبيدن غ-يمي ن-تگمي.» ييني-اس-ومغار: «نيزد س-صادا قا  
 ا-س-تريت ا-تسنگادات تاجاجت؟ مامنک ا-را-ستي-تسنگادات؟» ييني-اس-وحشمي:  
 «عور-سينغ ا-سيدي، عور-را-يتنگادا جاج عيغ-يرژا.» ييني-اس-ومغار: «را-تخلصت تاجاجت  
 لجديد.» ييني-اس-وحشمي: «وا-سيدي، عور-داري ما-س-ا-ست-يد-ساغ تاجاجت.» عيکنو  
 عيلما ار اکال غ-لگدام-نس عيبو ار-يتيني: «واي-امغار عيمقورن، واي-امغار عيمقورن.»  
 ييني-اس-ومغار: «عورد غمکاد ا-س-را-تخلصت تاجاجت.» ييني-اس-وحشمي: «واي-امغار،  
 تگوت دارک رحمت، تگوت دارک رحمت. غير صامح-يِي.» ييني-اس-ومغار: «عوھو،  
 عيقان-ک-يد ا-تسنگادات مايلي ترزيت.» يادر-وحشمي عي-يخف-نس، اشکو عور-يسين  
 ما-را-يسکر. عور-دارس ما-س-ا-يتخلاص تاجاجت لي-يرژا. عيقاما غين عيفسا.  
 عيسقسا-ت-داغ-ومغار: «نيس-ور-دارک ايت-دارک نيغد گمک دار لاباس، عيژضار ا-د-ياشک  
 عيفوگو فلاک دين-اد فلاک عيلان؟» ييني-اس: «عيللا داري يان عمي، والايني عور-سينغ

نيس-راد-ياشك. يازن ٺيلما ما-د-يتاوين عميس. ليغ-د-يڪشم، ٺيلدي-د زغ-وو ميس-نس سين ٺيقاريدن ن-نوڦرت، ٺيفڪ-تن ٺي-ومغار. بيني-ٺيلما-ومغار ٺي-وحشمي: <زايد ا-يوي س-سلامت، هاتي ٺيخلص فلاڪ عميڪ.>>

ٺيمناد-گيسن-وماراي ٺيسقسا-تن: <ٺيس-تفهم لمعنا-ياد؟> بيني-اس-ومسيڪل: <امغار ٺيگات-رٺي، د-وحشمي گيغ-ت نكي، ت-تاجاجت لي-يرزا تگا لخشانت لي-سڪرغ ٺولا افولكي لي-ور-سڪيرغ. ٺيما عميس ن-وحشمي، ٺور-سينغ ما-يگا.>> بيني-اس-وماراي: <غوالي ٺيخلصن دين لي-فلاغ ٺيلان، ار-اس-تيني انجام-نغ. اشڪو نگا ڪولواغ زوند احشمي-ان، ٺور-دارنغ ما-س-ا-نتفوكو ٺيخف-نغ. يوزن-د رٺي والي ٺيضران ا-يغ-يفوگو. يوشڪا-د ا-ٺيخلص فلاڪ والا فلا ٺيلا نغ ڪولواغ، ٺيفسي-اغ زغ-تاساست لي-غ-نلا. هاتي غ-واس لِحساب ٺيرا-يغ-بيني-ومغار ٺيمقورن <زايد ا-يوي س-سلامت، هاتي ٺيخلص-فلاڪ-ونجام-نڪ.>>

فسان ڪولوتن ار-سوينگيمن، ٺيسقسا-ت ٺيلما گماس ن-ومزيل: <ٺيغ-فلاغ-ٺيخلص نتان، ما-را-نسڪر نڪني؟> بيني-اس-وماراي: <ما-را-يسڪر-وحشمي-ان لقيست؟> بيني-ومسيڪل: <را-يفرح س-لحنانت ن-والي-ت-يفوگان ٺيحوٺو-ت باهرا، ييري ا-ديدس-يمون ٺيلي بدا ديدس اشڪو يووري ٺيعزا دارس باهرا.> بيني-وماراي: <ٺور-نضران ا-نسڪر يات اي-ايتما، ابلا نفرح س-والي-اغ-يفوگان زغ-دين لي-فلاغ-ٺيلان، نامن سرس، نامر گيس، نتڪل فلاس.> ٺيسقسا-ت-ومزيل: <يان سرس يومن، ما-را-يس-ٺيلي غ-واس لِحساب؟> بيني-اس-وماراي: <ٺور-را-فلائغ-ٺيلي لِحساب، اشڪو ٺيخلص فلا نغ ڪولو ما-يغ-ٺيفسارن. ٺور-را-يغ-ياج ا-نزري غ-لعداد لُقبر. اشڪو ٺيسونف فلا نغ لميزان ٺولا احو ن-تالوحت، ٺيجنجم-اغ زغ-لعافيت ن-جهنما. غمڪاد ا-فلائغ-تگا رحمت ن-رٺي غمڪلي ٺيقصاد زغ-يسيزوور.>>

زرين ديدسن ڪراض-ووسان، ٺينين-اسن ٺيلما ٺيمزيلن: <ٺور-جي-نسفلد ٺي-وان ٺيواليون-اد. زايدات ديدنغ يان سين-ووسان. نرا ا-نفهم ٺوگار ف-تغاوسيوين-اد.>> بيني-اسن-وماراي: <ا-گن-يبارڪ رٺي اي-ايتما. نرا، والائني ٺور-اس-نوفي، اشڪو سور لان

مدن ياضني، عيخصا-ياغ -تن-نعاون عولا نتني. >> بيني-اس-ومزيل: >>واخا -كُما،  
اجايت-اغ -ا-ديدون-نمون.>>

## 11. غ-دار-ومخار

كمنن عيلما ف-وغاراس-نسن ايليج لکمن ادوار لي-غ-لان سين عيفرخان، والي مي تينين  
حامو بو-تامارت د-ومداكل-نس حامو امخار. افن-تن-ين غ-يگران ار-تارسن تارگا،  
ار-زغ-کيس-سيتين تالاغت ت-تاسيکت. فرحن نتني ليج ژران امسيکل ت-تازويت  
د-وسمون-نسن، گاورن ديدسن غ-يان-ورتني، جمعن ف-ما-يسن-يجران غ-ووسان-ان.  
عيساول-ومزيل بيني-اسن: >>واي-ايتما، نسفلد فلاون عيزد سين عيد-حامو ا-تکام، والايي  
عور-بيان مانوا کيکون ايگان بو-تامارت، اشکو تا-يان کيکون عور-دارس تامارت.>>  
ار-کولو-ضصان. سقسان عيلما بو-تامارت: >>ماخ ايليج تحيفت تامارت-نک؟>> بيني-اسن:  
>>اشکو عوفيج يان ريزوار غ-تاما ن-ترگا.>> زايدن ار-کولو-ضصان. عيسماقل کيس والي  
مي تينين امخار بيني-اس: >>هاتي تبدلت عودم-نک غير س-ريزوار ن-سنات تاريالين.  
نيس-ور-ژضارغ اد-بدلغ عولا نکي؟>>

کلبن عيلما غ-ومسيکل عينين-اس: >>عيس-تعقلت ف-تجمعت-نغ، اشکو نسقسا-ک  
نيس-يژضار يان يوشن ا-يووري عيفولکي غ-دار ربي عولا غ-دار بنادم؟>> ار-کولو-تمنادن  
غ-وماراي اد-ژرن عيس-يسن لجاواب. بيني غاکودان اي-سين عيد-حامو:  
>>ليغ-کن-د-نروح، نونفا-کن-د-ار-تارسن تارگا. عينايت-يي، مانيزغ-د-وشکان-وامان-اد؟ نيزد  
تالعينت نيغد اسيف؟>> رارن-اس: >>تالعينت.>> بيني-اسن: >>عيما تالعينت،  
ليغ-د-زغ-کيس-فوغن-وامان مامنک اد-گان؟>> عينين-اس: >>زدديکن>> >>غوسن>> >>ميمن.>>  
بينی-اسن: >>عيما تالاغت-اد ت-تاسيکت-اد کيسن عيلان، ماني-د-سرسن-تکا؟>>  
عينين-اس: >>ار-د-کيس-تطار عيغ-زرينت لبهام عولا تاروا.>> بيني-اسن-وماراي:  
>>واي-ايتما، تترام امان ليج-د-فتان زغ-تالعينت زدديکن. ايناس-ا-د-فتون ار-تريژن س-يرکان  
د-واراس لي-ن-کيسن-يطارن، ارد لکمن ازغار خسين غ-کُر عيژران د-وملال، لاح-تن.>>  
عينين-اس: >>غمکان ا-يگا لحال.>> عيزايد بيني-اسن: >>سفلدايت، ا-يوون-ملغ لمعنا-ياد.



غمكان ا-يڭا بنادم ءولا نٽا. لَئِغَ ءيلول، ءيغوس-وول-نس ءيصفو لعاقل-نس. والائيني ار-يتهوآد تاكسارت ار-يزراي غ-گر-تحرآميت ت-تشيطان ت-دُونيت-اد ارد يووسر ءيضعف ءيمت. كولو ماخذ ءيزراي غ-دُونيت ار-ن-كيس-طارن ءيركان ار-ت-ژريژن. << ءيزايد-وماراي ءيسقسا-تن: <<ءيمّا تالاغت-ان د-يركان لي-يلان غ-وامان، ءيبان كرا غ-يڭي ن-وامان يبلي كرا غ-دو-وامان ءور-بيان. كرا ن-مدن، ار-كيسن-تبان ءيركان، ءيمّا ويياض ار-سنتالن ءيركان-نسن. كرا ن-مدن، ار-كيسن-تبان دَنوب-نسن، ار-مالان ءيس-را-فلاس-يتوت لحوكم. ءيمّا ويياض راد-بان دَنوب-نسن تيڭيرا.>>

ءيزايد-وماراي بيني-اسن: <<سفلدايت، را-يوون-ينيع يات لقيست. ها-يان-ورگاژ ار-يتكماي خامسين ن-والكارو ءي-واس. عمّر ن مالسا-نس والا ءيفاسن-نس ءولا كولو ذات-نس س-واضو لكارو. ءيكشم س-تڭمي، تڭي-ديدس-تمغارت ف-واضو لكارو. ءيكشم س-لحمّام ءيدل مالسا ءيفوغ-د ءيفولكي، ءور-سور-كيس-يلي كرا ن-واضو. هاتي زغ-برا-نس ءيفولكي، ءيمّا اكنس-نس مامنك ا-سور-يڭا س-واكو لي-سرس-يشكشم؟ اكو لي-يسركان تورين، نٽان ار-ت-ينغن. غمكان ا-يڭا بنادم. ار-يسيريد ءيلم-نس، ار-يسيريد مالسا-نس، ءيمّا ءول-نس ءيعمر س-كولو ما-يُخشن. مامنك ا-رات-يد-يسيرد؟>> بيني-اسن حامو ياضني: <<ءاي-اماراي، تسنت مامنك ا-نڭا. ءيشقا ا-نسغوس اكنس-نغ زغ-كولو مات-يسركاون. ءيشقا ا-نانف ءي-يواليون لّعب ءولا ءيسوينڭيمن اُخشنين. اشكو بنادم ءيضعف. واخا دا-يتيري ا-يسكار بدا ما-يرضان ربي، ءور-يژضار. نسن كولواغ نيس-ناقس.>>

ءيساول-د-ومخار بيني-اسن: <<ءالائيني ءيس-يژضار يان يُخشن ا-يفولكي غ-دار ربي ءولا غ-دار بنادم؟ نيس-يژضار ا-يتارس تالاغت ءولا تاسيكت ن-دَنوب زغ-وول-نس؟>> بيني-اسن-وماراي: <<ءيلا يان ءيژضارن ا-يسغوس ءول-نغ ا-كما. ءيژضار ا-يسيتي كولو ما-يركان والا كولو ما-يُخشن، ءيعمر ءول-نغ س-روح لّحانت د-سلامت. ءيغ-ك-تڭراژ ف-دَنوب لي-تسكرت، تفلت كولو ما-ك-يسركاون، ءور-را-ك-يخصا ابلا يات-تغاوسا.>> بيني-اسن: <<ما-تڭا ا-خالي؟>> بيني-اسن: <<ءيخصا-ك ا-تامژت غ-ونجام-نغ. امن سرس، تكلت فلاس، اشكو ءيفكا ءيخف-نس ا-يغ-يفرو زغ-كولو ما-يُخشن ءيسغوس-اغ باش ا-نڭ ميدن-نس. غمكان اس-را-تبدوت تودرت لّجديد، ءيصامح-اك ربي، ءيتو غايلي

تسکرت غايد عيزرين. را-کيک-يسکر يات لموعجيزت. را-ک-يسغوس زغ-وگنس-نک،  
 عيغمّر عول-نک س-وفولکي ن-يگنا. >>

ار-کولو-سوينگيمن غ-ماياد، عيزايد-يلما-وماراي بيني-اسن: >>والايئي اور-تتوم مامنک  
 اد-فرنت-تمغارين تينيلتيت اس ف-واس، ار-زغ-کيس-سيتنت تيزراتين عولا ايکيکر  
 لي-کيس-يلان. عيغ-تکشم س-تودرت لجديد، را-کن-يعاون ربي غ-کرايگات اس ار-تفرتم  
 زغ-کيگون کولو ما-يُخشن ايگ-بيت عيواليون نيغد عيسکيرن نيغد عيسوينگيمن.  
 را-کن-يعاون ا-تکيسم عيواليون لعيب عي-تجماعت لمعقول، تکيسم تیکرکاس عي-واوال  
 ن-صاحت. را-کن-يعاون ا-تانفم عي-کولو ما-را-کن-يلدي س-تشيطنات، تاگوکم زغ-ويلي  
 عيميورن عيرکان ن-دونيت-اد. را-ديدون-بيلي والي عيضران ا-کن-يحنجم زغ-کولو  
 ما-يسرکاون عول ن-بنادم. امنات سرس، تامزم کيس، تکلم فلاس. غمکان  
 ا-را-بدا-تفولکيم دار ربي. >>

بينی-اس-ومخار: >>والايئي مامنک ا-را-نفولکي دار مدن؟ مامنک ا-را-يغ-صامحن مدن؟  
 اشکو عور-رضارن اد-تون غايلي نسکر غايد عيزرين. >> بيني-اس-وماراي: >>نکني،  
 عور-سور-ا-نتمناد غ-يان غمکلي کيس تمنادن مدن ياضني. اشکو يان عيکشم س-تودرت  
 لجديد، نسن عيس-ت-يسکر ربي زغ-لجديد. لاح زغ-کيس اقديم، يووري ايگ وين  
 لجديد. اشکو ربي عيسکر سلامت غ-گراس ديدس ف-وودم ن-ونجام-نغ.  
 عور-سور-ا-يتحاسب دنوب-نس. يان يوورين ايگا لجديد، را-ت-نقبل نکني  
 غمکلي-ت-يقبل ربي. را-ت-نتيري نحووت. عور-را-نسوينگيم غ-ما-يزرين. يان تين  
 ايگان ايگا امخار، عور-سور-را-يس-نتيني ايگا امخار. اشکو عيلا فلاغ ا-نتو غايلي عيسکر  
 غايد عيزرين. >> عيسقسا-ت غوالي مي تينين امخار: >>عياغ-يگا غمکاد، مان عيسم  
 ا-را-بي-تفکيم؟ >> بيني-اس-وماراي: >>را-ايک-نتيني حامو لجديد اشکو حامو اقديم عيموت  
 زغ-کيک. >>

عيساول-د-يلما حامو ياضني بيني-اس: >>نشکر-ک اي-اماراي ف-واوال-اد. >>  
 بيني-اس-وماراي: >>ا-نشکر ربي، اشکو نتان ا-يغ-يصامحن ف-کولو ما-نسکار يخن. >>  
 عيضالب-ت-يلما حامو لجديد بيني-اس: >>ا-غ-ا-ديدون-نمون غ-وغاراس نسفلد

ءي-وڻگار ف-تغاوسيوين-اد. >> بيني-اسن: <<فتوات موناڊ ڊيدنغ. تلا سور لوقت ما-غ-ا-نٿرا  
اڪساب.>> ڏون ڱاڪودان اون ي-وڱاراس.

## 12. غ-دار-وڪساب

ليغ-ن-لڪمن دار-وڪساب، مون ڪولو غ-تخيامت فرحن ٺي-نڪراتسن.  
يعاود-اسن-ومسيگل ف-ڪولو ما-يسن-يجران ءولا ف-مامنڪ اڊيدسن-يمون-وماراي  
ت-تامنت د-ومزيل د-گماس د-سين عيد-حامو. ويسقسا-تن-وڪساب: <<يس-توفام لجاواب  
ئي-وسقسي-نغ؟>> عيساول-د-وماراي بيني-اس: <<ما-يگا-وسقسي-نون ا-گما؟>> بيني-اس:  
<<لان دارنغ سين عيسقسيتن. امزارو عيگا-ت، ما-يگان افولڪي؟ مامنڪ ا-را-نيڙضار  
ا-نيسان ما-يفولڪين زغ-ما-يخشن؟>>

توت تاضصا غ-ووودم ن-وماراي، بيني-اسن: <<فسايت.>> فسان، عيهڏن لجال. بيني-اسن  
ڱاڪودان: <<سفلدايت ئي-وول-نون مامنڪ ا-يٿيني <تاك تاك تاك>. سفلدايت ئي-وول-نون  
اي-ايتما، ا-ر-د-يسبايان سيدي ربي لحق ئي-وول-نغ، اشڪو ءول ن-بنادم ا-يگان  
تودرت-نس. ڱاڪود نا-يفسا-وول، هاتي عيموت. ءول-نس ا-مي-يمالا ربي ما-گيس-يرا  
ماحد ءيدر، را-يوون-د-يمالا ما-يفولڪين ءولا ما-يخشن. سفلدايت  
س-اينا-ياون-يٿيني-وول-نون، تسكرم سرس، اشڪو لحق ن-ربي ا-را-يگ.>>

تيني-اس-تمغارت ن-وڪساب: <<سفلدغ-نيٽ ئي-وول-ينو مامنڪ ا-يگاٽ، والايني  
ءور-جي-گيس-سحساغ س-ڪرا ن-واوال زغ-ربي. مامنڪ ا-را-يغ-د-يمالا ما-يفولڪين  
زغ-ما-يخشن؟>> بيني-اس-وماراي: <<يان عيمورن ا-يسفليد ئي-يگضاض را-يسان  
ڪرايگاٽ يات زغ-تالغات-نس. يان عيمورن ا-يتبار ئي-يگران ءولا تيحونا را-يسان  
زغ-توگوت منشڪ ن-وزموزل ا-گيس-يلان. عيما يان عيمورن ا-يسفليد ئي-وول-نس  
را-يسان ما-يفولڪين زغ-ما-يخشن. اشڪو ءول-نس ا-را-يعبرن ما-يتمناد ءولا  
ما-مي-يسفليد. عيغ-تترام يان-د-يگوزن ف-وسردون عيسني فلاس ابيضار، تيسانم عيزد  
افولڪي اين عيسڪر. عيغ-تترام يان-د-يوسين لخنشت عيزاين ئي-تشيانت عيسلڪم-اس-ت

ئىللى ترا، تىسانم عىزد لخير اين عىسكر. يان عىستىن جاج زغ-وغاراس، عولا يان-د-يرورن اغىبول عىجلان ئى-باب-نس، نسن كولوغ عىزد افولكى اين عىسكر. عول-نغ ار-اغ-يمالا نىس-يفولكى-انتعاوان مدن غمكاد. مايداد، عىتياوسان غ-دُونىت كولو، غ-كرايگات تامازىرت زغ-زمان سور س-غىلاد، اشكو عول ن-بنادم ار-اس-يمالا ما-يفولكىن. وان عىفولكىتن-اد، نژضار-اسن كرايگات اس. «يىني-ومسىگل: «عور-ئىلى يان كىتنغ عىسكرن كولو ما-مى-ئىژضار عىفولكى. عور-ئىلى يان عىفولكىن س-وفولكى عىكملىن.» يىني-اس-وماراي: «ئىغزان-واوال-اد اي-امسىگل، والائىي (يان عىسن ايسكار افولكى عورت-يسكىر، دنوب ايس-يگا غايان.» تىني-تمغارت ن-وكساب: «ئىلا دارك لحق اي-اماراي. عىرخا-نىسان ما-يگان افولكى والائىي عىشقا ات-نسكار.»

يىني-وكساب: «تملىت-اغ مامنك ا-يگا-وفولكى. والائىي ما-س-راد-ئىسان مدن ما-ئىخشن؟ اشكو عور-اسفلىدن س-ما-ئىسن-يمالا-وول-نسن. ميورن اد-سكارن ما-ئىخشن ايلغ عور-سور-ازمزالين ما-ئىخشن زغ-ما-يفولكىن.» يىني-اس-وماراي: «ئىغزانت ا-گما. والائىي سن عولا نئىي ما-يفولكىن زغ-ما-ئىخشن. عور-ئىلى بو-تكركاس عىتصبارن ئى-يوس افلاس-ئىسكاركس. واخا دا-ئىسكىركىس باباس عوگار ن-كولو ايت-ودوار، عور-را-ئىحمال يوس افلاس-ئىسكاركس. اشكو تالا يات-تحكىمت غ-وول ن-بنادم ئى-ئىسبايان تىكركاس عىس-أخشتت، عور-سار-كشمت لخاطر ن-بنادم. عولا تامخارت، عور-ئىلى-ومخار عىتصبارن ئى-يان-ت-ئىتاگرن. واخا عىطاف ايدا عىگوتن ئىسان عىس-ئىحتاجا وائاض، عور-رات-ئىحمال ات-ئىتاگر. اشكو تالا يات-تحكىمت غ-وول ن-بنادم ئى-ئىسبايان تامخارت عىس-ئىخشن، عور-سار-تكشىم لخاطر ن-بنادم. عولا يان عىتزون عور-را-ئىصبر ئى-تمغارت-نس افلاس-تزنو. اشكو تالا يات-تحكىمت غ-وول ن-بنادم ئى-ئىسبايان زنا نىس-ئىخشن، عور-سار-ئىكشم لخاطر ن-بنادم. غمكان اس-نسن كولوغ ئى-ما-ئىخشن.» يىني-اس-وكساب: «ئىلا دارك لحق اي-اماراي. عىرخا-نىسان ئى-ما-ئىخشن والائىي عىشقا ايس-نانف ناگوش فلاس.»

يىني-اسن-وماراي: «ئىمما وئىس سىن عىسقىستىن، مامنك ا-يگا؟» يىني-اس-وكساب: «يان عىسن ئىس-ئىسكر ما-ئىخشن، ئىسان ئىس-ور-ئىسكىر ما-يفولكىن، مامنك ا-را-ئىس-ئىلى

سّلامت غ-گراس د-رَبِّي؟ مامنك ا-را-يامز رضا ن-رَبِّي؟ ما-را-يسكر افاد ا-يس-يصامح  
رَبِّي؟»

بيني-اس-وماراي: «ژرايت اغيول-ان اشهبون ن-تاما ن-تخيّامت. ليغ-ت-يخلق رَبِّي  
يسكر-اس-يان-رسم عيضيلى ف-يگي ن-يضران-نس لگدام. مامنك ا-يگا رسم-ان؟»  
بيني-اس-وكساب: «زوند عيغ-تسرت سين عيكورين، يان عيبي وايّاض.»  
بيني-اس-وماراي: «رسم-ان عيگا تاماتارت لّعهد لّجديد غ-گراغ د-رَبِّي. سفلايت  
را-يوون-فلاس-ينيغ. عيگا-تين يان-ورگاز عيفولكين، ار-يسكار كولو ما-گيس-يرا رَبِّي  
ار-يسلماد مدّن ف-وغاراس-نس. ار-يتحنو غ-مدّن ار-يتعاون وانا عيحتاجان. ار-يسكار  
لخير غ-كرايگات يان، ما-يمقورن عولا ما-يمزّين. يان-واسّ عيسودا ف-يان-وسنوس  
س-تمدين عيمقورن. فرحن سرس ويلى عيمناگار غ-وغاراس. والايّني ليغ-ن-يلكم  
تامدين، عيغضرت يان زغ-يمدوگال-نس، امژن-ت كرسن-ت، بين تيملسا-نس، عوتن-ت  
س-يكورين. عيما نّان عور-اسن-پرور س-يات، عور-تن-يوت عولا عيژي ديدسن عولا يوسي  
سرسن سيف. اوين-ت عيلما، اكلن-ت ايمت ف-يان-وگجدي. اگجدي-ان، لان گيس  
سين عيكشوضن، يان عيژا غ-واكال، د-وايا عيبي-ت غ-يگي، زوند رسم لي-يلان  
غ-وغيول-ان. هاتين عيتياگال، فين عيدامن-نس ار اكال، عور-يبي يات، ابلا يان-واوال.  
يولّ اوال-نس س-يگنا بيني «وا-رَبِّي، صامح-اسن. عور-اك-سينّ عي-مايد سكرن.» كولو  
مايان عيقصاط-ط رَبِّي عيسن-ت زغ-يسيزوور، اشكو عيسكر تاماتارت-ان ف-كرايگات  
اسنوس نا-يلولن غ-دوونيت كولو، افاد ا-ور-نتو ما-يسكر غواليّ عينين ف-وسنوس عولا  
مامنك ا-يضالب زغ-رَبِّي ا-يصامح عي-ويلى-ت-ينغان.»

عيزايد-وماراي بيني: «ارگاز-ان عيسودان ف-وسنوس، عور-يگي زوند مدّن ياضني، اشكو  
عور-جيد نّان ا-يسكرن كرا يُخشنّ عولا كرا عيسحشامن. ار-بدا-يسكار افولكي عي-كولو  
مدّن. عيكمّل كولو ما-گيس-يرا رَبِّي. عور-يحتاجا ا-يس-يعغر عولا عيضالب زغ-گيس  
رحمت-نس. عور-فلاس-يلى لحوكم لّموت لي-يلان ف-كولو مدّن ياضني. مايان  
ا-ف-گيس-يقصاد رَبِّي ا-يسكر كرا مو عور-يضرار يان ابلا نّان. يوزن-ت-يد ا-يسكر كرا  
عيفولكين باهرا.» بيني-اس-وكساب: «ما-گيس-يقصاد؟ ما-ف-ت-يد-يوزن؟» بيني-اس:  
«يوزن-ت-يد ا-ياسي ف-يخف-نس لحوكم لي-يلان ف-بنادم. نّان، عور-ت-يد-يقان

ا-يتعدب ف-سببت ن-كرا عيسكر اشكو عور-كيس-يلّي كرا لّعب، عور-جّي-يسكير كرا  
 يُخشن. مايان ا-ف-يژضار ا-ياسي لعقويت لّي-يّلان ف-وييّا. يوزن-ت-يد ربي ا-يمت،  
 عيزري غ-لعداد لّقر، اينكر عيلما زغ-كّر ويلّي مّوتنين. غمکان ا-ف-يسباين ربي  
 نيس-يومژ رّضا-نس، اشكو عيسنكر-ت-يد زغ-ومضال س-تودرت لّجديد. يال-ت-عيلما  
 زغ-دّونيت-اد ا-يكشم س-دارس غ-يگنّا. عيما غيلاد عيفكا تودرت-اد لّجديد عي-كولو وانا  
 سرس يومن، عيسكر سلامت غ-كراغ د-ربي، عيسكر لعهد لّجديد غ-كراغ  
 د-والي-اغ-يخلقن.»

عيسقسا-ت-وكساب: «ما-يكا غواد-يوشكان عيفك-اغ سلامت؟» بيني-اس-ومسيكل:  
 «عيكات-والي مي نتيني انجم-نغ.» تيني تازويت: «عيكات-ت-ومكسا عيفولكين  
 لّي-يتمتاتن ف-وولي.» بيني-حامو لّجديد: «عيكات-والي-اغ-يسغوسن زغ-واوگنس-نغ.»  
 بيني-ومزيل: «عيكات-والي عيخلصن دين لّي-فلاغ-يّلان.» فسّان كولو غاكودان،  
 ار-سوينگيمن غ-ما-يتيني-وول-نسن.

كاورن غ-زريت غ-يضر-ان. نكرن زيک صباح، ياوي-اسن-د-وكساب اگفاي ن-وولي،  
 شن سون. فوغن عيلما، عيمون-ديدسن-وكساب ت-تمغارت-نس. فلن تاروا-نسن، كرا  
 عيكسا وولي، كرا عيقاما غ-تخيّامت. عيكتي-د-ومسيكل لقنضرت عولا تالي عيضرن  
 غ-واسيف تيگليّت، ار-يتيني د-يخف-نس: «عيرا-يشقو ا-نبي عيغ-ينگي-واسيف  
 س-وگار.»

ليغ-د-كوزن زغ-ودرار كشمّن تاگانت، فتون ايّغ لکمن اسيف. افن-ين لقنضرت  
 يوي-ت-واسيف نتات عولا عيژران-نس. سقسان ويّلي-ن-وفان: «مامنك ا-را-نبي؟»  
 عينين-اسن: «زايدات تاونم عي-واسيف ار-ن-تلکم لقنضرت مقورن.» زايدن غاكودان،  
 ياگوگ لّحال عورد عيميك. ليغ لکمن لقنضرت مقورن، تعجبّن كيس اشكو تدوس باهرا،  
 تاتي ف-واسيف، عور-ژضارن-وامان ا-ست-لکمن. بين عيلما س-لامان، مون داغ  
 د-وغاراس.

عيساول-وماراي ييني-اسن: «اسگاس ار اسگاس ار-سكارن مدن لقناضر ن-وكشوض،  
 ار-تنت-يتاوي-واسيف. صلحت لقناضر-ان ءي-يات لوقت، والايئي غاكود  
 نا-د-ينكي-واسيف ار-تند-د-يگار. نيس-تفهم لمعنا؟ غمکان اد-گان عيسكيرن ن-بنادم.  
 مايي نسكار نكني عيصلح ءي-يات لوقت والايئي ار-يطار تيگيرا. ار-يطوضا يان، ار-يتزالا  
 ار-يتازوم ار-يسكار كولو ما-ت-يد-يقان غ-دين افاد ان-ياكمور س-ربي. حقان  
 را-يس-صلحن كولو عيسكيرن-ان ءي-يات لوقت، والايئي ءور-يسين عيس-راد-زگان ار  
 ليخرت نيغد ءوهو. ار-تيرين مدن لقنضرت ما-س-ا-تئين زغ-دونيٓت س-يگنا، والايئي  
 شگان اور-تن-تسروح لقنضرت ن-يسكيرن-نسن س-تسگا-يان ياضي، عيكساخن  
 اتن-ياوي غاكود نا-د-ينكي س-ونگاي لموت. اشكو لقناضر لي-سكارن نتي دا-طارنت.»  
 ييني-ومسيگل: «نحتاجا كرا لقنضرت عيدوسن تائي، را-يغ-تاوي زغ-دونيٓت ار عيگنا، بلا  
 نشگا والا نكسوض. سنع ما-تقساط اي-اماراي، اشكو عيلا يان عيگا لقنضرت عيدوسن.»  
 ييني-اس-وماراي: «تغزانت اي-امسيگل. يان عيفتان ف-لقنضرت-ان  
 ءور-را-ينشگ-وضار-نس ءولا عيضرن غ-ورواس. عيرا-يروح اگماض ياضي س-سلامت.  
 اشكو عينا نتان: «نكين ايگان اغاراس ءولا لحق ءولا تودرت. ءور-را-يروح يان دار ربي  
 ابلا عيغ-ت-سروحغ نكي.»»

بيدن عيلما اد-زالن، ار-تشكارن ربي ار-تينين: «وا-ربي سيديتنغ، ار-ك-نتالغ اشكو  
 توزنت-اغ-د انجام-افلاغ-يسيتي دنوب-نغ، عيرزم-اغ-زغ-يسكراف ن-دونيٓت-اد، عيسكر  
 لعهد ن-سلامت غ-گراغ ديدك، عيخلص دين لي-مي-ور-نرصار، عيزري-اغ-زغ-دونيٓت  
 س-ليخرت. كولو ماياد، كبي ات-يقصادن س-لحنانت-نك ءولا رحمت-نك دا-يگوتن.  
 عيما غيلاد ا-سيدي ربي، كود-اغ-غ-وغاراس، تسلكمت-اغ-غ-لامان س-دار-تفقيرت.  
 مل-اغ-مامنك است-نسهنو زغ-كولو ما-ست-يسويدن. نضالب ماياد س-يسم  
 ن-ونجام-نغ. امين.»

### 13. غ-دار-تفقيرت

زايدن غ-وغاراس ار-ساوالن عي-نكراتسن ف-كولو ما-يجران. فتون ايلغ لکمن تاحشوشت ن-تفقيرت. غير توکز-تن-د-تفقيرت تفوغ-د تحبل-تن-د ار-تسودون. کاورن کولوتن، کرا عيسکيوس ف-توگا، کرا عيسکيوس ف-يثران غ-تاما ن-تاحشوشت، اوين-د امان زغ-تالعينت. لئغ سوان، ييني-اس-ومسيگل: «ا-خالتي، نيس-تعقلت؟ ننا-يام را-نزر نيس-سور-يلا کرا ن-وفولکي غ-دونيت-اد. ها-ياغ غيلاد، افولکي ا-کيس-نوفا.»

تيني-اسن-تفقيرت: «عولا نکي، لاخبار عيفولکين ايداري-توفام. را-يوون-ينغ ما-يي-يجران، عيفولکي عوگار ن-کولو ما-يگان افولکي. سين-واضان اياذ گنغ، س-يي-د-بيان غ-توارکيت يان عيگا زوند لمالاک. تملول-تملسيت-نس زوند ادفل، ار-تسمريقي زوند عوسمان، ياسي غ-وفوس-نس يات-تساروت ن-وورغ. عيساول ديدي س-يواليون-نغ عيتا-يي: «اشک-يد کمي-اد عيکاتن تامارا تاسيت تازايت عيشقان، سونفوغ-ام. اسي تازاکلوت-ينو تلمت زغ-کيکي، اشکو عيهنا کيکي لحال، عيمر-وول-ينو س-لحنانت، تافت کيکي راحت لي-تحتاجات.» لئغ سفدغ عي-واوال-ان سقساغ-ت «ما-تکيت کيي ا-سيدي؟» ييني-يي-د «ور-تا-يي-تسينت ايلي عيعزان، والايي را-يي-تيسانت تيکيرا.» عينغ-اس «ا-سيدي، ما-تگا-تساروت-ان عيلان غ-وفوس-نک؟» ييني-يي «ختاد تگا تاساروت لجنّت، توجاد عي-تاساعت-نس.» عينغ-اس «ريغ ا-سيدي، اد-فلغ دونيت-اد، مونغ ديك س-ينا تریت.» عيمناد کيکي غاکودان، عيبان غ-وودم-نس لحنانت عيگوتن زوند عيغ-يسن کولو ما-فلا-يزرين ن-تمارا عولا تاكوضي. ييني-يي «ور-تا-تلکيم تاساعت-نم ايلي. والايي غ-تودرت ن-دونيت-اد ا-غ-را-تثرت افولکي ن-رئي. را-تکشمّت س-ونتال لامان تسونفوت زغ-کولو ما-يسرفوفون.» س-دي-تفاغ. قاماغ غمکان غ-لفرش، عيهنا-وول-ينو س-لهنا عيگوتن. ار-سوينکيمغ ار-سوينکيمغ، عور-سينغ ما-تگا لمعنا ن-مايلي ژريغ. عيزد لمالاک ا-يگا، نيغد کرا يااضي؟ ما-تگا-تساروت لي-يلان غ-وفوس-نس؟ مانغ عيلا-ونتال-اد لامان لي-س-را-يي-ياوي؟ مامنک ا-يگا-وفولکي لي-راد-ژرغ غ-دونيت-اد؟»

لئغ سفلدن عي-ما-يسن-تتا-تفقيرت، عيضر-اسن لعجب کولوتن. عيساول-وماراي ييني-اس: «وا-خالتي، تامبارکيت ا-تکيت، اشکو عيبان-ام-د-ونجام-نغ غ-توارکيت. عيرضا فلام،



عيفك-ام-تکشمّت س-لامان ن-رَبِّي غ-دُونيت-اد ءولا ليخرت. >> تسقسا-ت: >>«عيمّا تاساروت؟» ييني-اس: >>«ور-يژضار يان ا-يکشّم س-تکّمّي ن-وايّا ض عيغ-ور-اس-يعريض بو-تکّمّي. وور-يژضار يان ا-يکشّم س-لجنتّ عيغ-ور-اس-يرژيم والّي دار تاساروت.» تيني-اس-د تازويت: >>«عيزد انجّام-نّغ نّتان ادار تاساروت لّجنتّ؟» ييني-اس-وماراي: >>«نّتان اينّا >طافغ تيسورا لّموت ءولا ادغار ن-ويلّي مّوتنين. > عينّا >اينّا رژمغ نکّي، وور-يژضار يان ا-ت-يقن. د-اينّا قنغ، وور-يژضار يان ا-ت-يرژم. > عينّا داغ >نکّي گيغ عيمي. يان زغ-گيگي عيکشّم ر-ينجم. وائّا-د-سري-يوشکان، وور-سار-ت-رورغ.» >>>

عيمناد-وماراي غ-تفقيرت ييني-اس: >>«تامبارکيت ا-تکّيت ا-خالتي، اشکو عيدروس ما-را-يکشّم زغ-يمي-اد. عينّا والّي-ام-د-بيان غ-توارکيت >کشمايت زغ-يمي عينوکمان. اشکو والّي يوسعان ار-يتاوي س-لهالاک، عيکّوت ما-زکيس-يکشّم. عيمّا عيمي-اد عيتاوين س-تودرت، هاتي عينوکما، عيدروس ما-ت-يتافان. > يان-واسّ عيساول د-ويلّي سرس ءومنين ييني-اسن >ا-ور-تاجّم تاغوفت ا-تکشّم س-وولاون-نون. امنات س-رَبّي، تامنم ءولا سري. اشکو راددوغ اد-اون-ين-جّوجادغ ادغار. راد-وورّيغ اويغ-کن ديدي، تيليم ءولا کونّي غ-يلّغ راد-يلّغ نکّي.» >>>

تيني-اسن-تفقيرت: >>«شکرغ-ت عي-سيدي رَبّي. وور-سار-راد-توغ تاوارکيت-اد ءولا لمعنا-نس. وور-کسوزغ غيلاد زغ-ما-را-بي-بيلي غ-ليخرت، والايّي وور-تا-سّينغ عيس-يلا لامان غ-دُونيت-اد.» ييني-اس-وماراي: >>«ليغ-د-يوشکا-ونجّام-نّغ س-دُونيت، ار-يتکا کرايگاتّ ماني ار-يسکار افولکي عي-کولو وائّا عيحتاجان. ار-بدا-يسوينگيم غ-ويلّي ضعفين ءولا ويلّي هرشنين ءولا ويلّي کسوزنين. ار-يجّوجي وينّا تياوکرافين س-يسکراف ن-شيطان. يان-واسّ عيلا غ-تکّمّي ن-تزالّيت، تيلي غين يات-تمغارت، عيکرف-ت يا-لّجنّ تام د-مراو ن-وسکّاس. تکّا توکّيت، وور-تژضار ا-تسّنم تيدي-نس. ليغ-ت-يژرا عيغر-اس ييني: >وا-تامغارت، ها-کميّ تفسيّت زغ-وسکرف-نم. > عيسرس فلاس افس-نس س-تنم غ-تيدي-نس حايئا. غمکان ا-يتحّو ف-وائّا عيتياوکرافن. سور س-غيلاد عيژضار ا-يجنجم وائّا عيزاوگن غ-يسم-نس، عيسنتال-ت زغ-شيطان ءولا زغ-کولو ما-يسرفوفون. اشکو ار-يسفليد عي-وائّا-يس-يگران. عينّا: >ا-ور-تيکساظ. غير امن. > ا-ور-تيکساظ ا-خالتي. زاوگ غ-يسم-نس، تيليت بدا غ-لامان. عيرا-کم-بيبارک ءوگار ن-کولو ما-تسوانگمت.» >>>

توت تاضصا غ-وودم ن-وماراي بيني-اس: «غ-ووستان-اد-را-نثر ما-را-يسكر ربّي عيفولكي  
ف-سببت-نم.»

بينی-یلما-وماراي: «لوحوش، را-تن-نطاي زغ-تاكانت، عیما غوید یاضني اور-یتبان،  
را-یم-ینیغ مایلی را-یسن-نسکر. اشکو انجام-نغ، عیطاف فلاسن لقوّا ما-س-ا-تن-یسوفوغ.  
لیغ عیلا غ-گر مدّن غ-دّونیت-اد، کان تین ار-اس-دی-تاوین ویلی-غ-لان لجنون.  
ار-تن-زغ-کیسن-یسوفوغ س-یان-واوال، عیجوجی کولو ویلی عوضنین.» تینی-اس-تفقیرت:  
«لعجب ایگا مایاد. نشکر-ت عی-ربی لی-د-یوزنّ یان عیضارن ا-یسکار غمکاد.»  
بینی-اس-وماراي: «عیغ-سرس-تومنت عولا کمی، عیرا-کم-یسنتال زغ-کولو ما-یسرفوفون.  
اشکو لجنون ار-تیکساغن زغ-یسم-نس، ار-زغ-کیس-رگن. اور-رضارن ان-لکمن یان  
عیزاوگن غ-یسم-نس.» عینکر-یلما-وماراي ت-تامنت د-ویلی دیدسن عیمون، لولین-د  
عی-تحشوش ن-تفقیرت. یال-وماراي اوال-نس بیني: «س-یسم ن-ونجام-نغ  
اس-اون-نیغ، فوغات زغ-تحشوشت عولا تالعینت عولا تاكانت-اد، اور-سار-دی-تووریم.»  
عینین «امین. امین.»

عیساول عیلمّا س-تفقیرت بیني-اس: «زاوگن بدّا غ-یسم ن-ونجام-نغ، تینیت-اس کولو  
ما-کم-یهمان. را-کم-یک غ-ونتال-نس.» تینی-اس: «عومنغ نکي س-والی فلا عیبیدن  
غ-توارکیت، والاینی اور-سینغ مامنک اد-تزالاغ والا مامنک ا-تی-تضالابغ.»  
بینی-اس-وماراي: «نيس-ور-سرم-یساول تین دارنغ؟ غمکان اسرس-تساوالت عولا کمی  
لوقت نا-تریت. را-یسنان ما-تریت عولا ما-تضالابت. ساول دیدس زوند عیغ-سور-تمزیت  
غمکلی تساوال تاراطّ د-یناس. اشکو یان-واسّ عوشکان-د دارس کرا ن-مدّن اوین-اس-د  
تاروا مژنین، عیرین ان-فلاسن-یسرس عیفاسن-نس عیبارک-تن. نکرن عیمحضارن-نس  
حصارن-تن. عیما نتان عینا-یاسن «اجات تاروا مژنین ا-د-داری-اشکین. ا-تن-ور-تحصارم،  
اشکو زوند غوید ا-می-تلا-تکلدیت ن-یکنا.» بیني-داغ: «وانا اور-یرین ا-یکشم  
س-تکلدیت ن-ربی زوند ارّاو عیمژین اور-را-سرس-یکشم.» امن سرس ا-خالتي س-نیت-نم  
غمکلی تامنّ تاروا مژنین.»

تال-تفقيرت الّن-نس س-يگنّا تيني: «وا-سيدي ربّي، شكر-غ-ك اشكو ترورت-يّي-د ليمان لّي-داري-يلان ليغ سور مزيغ. تاكمورد-د ا-يّي-تسهنات عول-ينو زغ-كولو ما-يّي-يسيكساغن. تاويد مدّن-اد س-داري ا-يّي-تعاون غ-كولو ما-فلا-يشقان.» فرحن كولوتن غاكودان، ار-كولو-تشكارن ربّي. تمون-ديدسن-ولا-تفقيرت، امزن اغاراس س-دار بو-وخرب. ليغ فتان ار-تاسين يات تالغات اي-ربّي: «ربّي واحدوت اذار-سيگيلغ اسونفو، دارس ا-غ-طافغ لامان. ربّي واحدوت ا-يگان اجاريف-ينو ايگ لبرج ايگ انتال-ينو، عور-سار-موسبيغ.»

#### 14. غ-دار بو-وخرب

افن-ين بو-وخرب زوند لعادا-نس ايگاور غ-تاما ن-وخرب-نس ار-يسوينگيم. واخا-تن-يوكز، عيقاما ار-كيسن-يتمناد منشك. عيسيلف-اسن عيلما س-وفوس، گاورن كولو غ-تاما-نس. عيسماقل داغ كيسن عيسقسا-تن: «امندرا، عيس-تلکمّ تما ن-وغاراس؟» بيني-اس-ومسيگل: «لحقّ ا-تيت غاسان ا-خالي. اغاراس-اد عور-يطاف تما، والايي نوفا كيس مايلي-س-ا-نسيگيل. عيما كيي، ار-وگان-سور-تسوينگيمت. عيس-توفيت كرا ايگان لجديد؟» بيني-اس: «هاتي غ-يلغ-يّي-تفلم ايد-غ-يّي-دي-توفام.» عيمناد بو-وخرب غ-وماراي بيني-اس: «عيما كيي ا-گما، ما-يك-يبان غ-دونيت-اد؟ نيس-ور-د-فلاس-تگوز كرا ن-تاگات؟ نيس-ورد زوند عوخرب-اد ا-تگا، تهرش س-واطان عولا كرايگات زالت؟» بيني-اس-وماراي: «دارك لحقّ ا-گما.» عيمناد كيس بو-وخرب عيسقسا-ت: «عيزد غمكاد ا-تگا دونيت زغ-يسيزوور-نس، نيغد عيجرا-يس كرا عيسخصرتّ ايلغ تلکم تيزي-ياد؟»

عيسقسا-ت-وماراي: «ما-تسوانگمت؟ والي عيخلقن دونيت، مامنك ا-يگا؟» بيني-اس: «عيفولكي نتان، عور-ا-يسكار كرا يخنن.» عيسقسا-ت-داغ-وماراي: «ما-مي-يژضار والي عيخلقن كولو ما-يلان؟» بيني-اس: «عيبان عيس-يژضار اي-كرايگات كرا.» بيني-اس-وماراي: «صاحت ايد تيت ا-گما. سيدي ربّي، ليغ عيفولكي باهرا، اير-ييري ا-يخلق دونيت تفولكي. ليغ عيژضار اي-كرايگات كرا، را-ييژضار ا-ست-يخلق تفولكي.»

نیغد ءو هو؟» یینی-اس: «تُغزانت ای-امارای. والاینی لیغ-ت-یخلق تفولکی، ما-یس-یجران  
 ءیسّخصار افولکی-نس؟» ءیسقسا-ت-داغ-ومارای: «ما-یُخشنّ باهرا غ-دُونیت؟»  
 یینی-اس: «بنادم ایُخشنّ باهرا، ار-یتضلام ار-یتماغ ار-ینقا. والاینی ءیلا-واطان ءولا  
 تاموخت ءولا زلازل ءولا لهیف، ءور-اتن-یسکار بنادم. تاغوسا-یاد اور-یرین  
 ای-ی-تیاوفهام. ماتا تاگات-اد-یکوزن ف-دُونیت؟»

یینی-اس-ومارای: «سفلدایت را-یوون-ینیغ ما-یجران. لیغ ءیخلق سیدی ربّی دُونیت،  
 ءیسماقل غ-کولو مایلی ءیسکر، هاتی ءیفولکی باهرا. ءور-تایلی-واطان ءولا ما-ینقان.  
 تفولکی دُونیت غمکلی ءیفولکی ربّی. ءیسکر کیس یات تالعرصت، ءیخلق کیس ادام  
 ت-تمغارت-نس. یوصّا-تن ا-کیس-تهلان ار-شتان زغ-لغلت ن-کولو ءیسغارن، ابلا  
 تاسغارت ن-تواسنا ن-ما-یفولکین ءولا ما-یُخشنّ. یینی-اس ربّی ءی-ادام: «اس  
 نا-زغ-کیس-تشتیت، غاسان ار-فلاک-تیلی تاگات لموت.» یاشک-ید شیطان غ-صورت  
 ن-ولکُمّاض س-تمغارت یینی-اس «ءو هو، ءور-را-فلاون-تیلی کرا ن-تاگات. ءینا-یاون  
 غمکان اشکو ءیکسوز ا-تکم زوند نتا، تیسّانم ما-یفولکین ءولا ما-یُخشنّ.» تثر-تمغارت  
 تاسغارت-ان، تعجب-تّ تشتها ا-زغ-کیس-تشرّ، تسوانکم نیس-تضرار ا-سن-تفک ءولا  
 تاواسنا. تکس-د زغ-لغلت تشرّ-تّ، تفک-تّ ءی-ورگاز-نس ءیش-تّ ءولا نتان. ءیغر ربّی  
 ءی-ادام یینی-اس: «نیس-تشتیت زغ-تسغارت لی-ف-ک-وصّاغ اور-زغ-کیس-تشت؟»  
 یینی-اس ادام «تامغارت-ینو ای-ی-ست-یفکان.» یینی ربّی ءی-تمغارت «ماید تسکرت؟»  
 تینی-اس «الکُمّاض ای-ی-ست-یسفولکین.» غاکودان ا-تکوز نعلت ن-ربّی ف-ولکُمّاض  
 اور-سار-ینیاحمل بنادم د-ولکُمّاض.» یینی ءیلما ربّی ءی-تمغارت «س-ونگاژ ءیشقان  
 اس-را-تاروت. را-تیلیت غ-دو-وفوس ن-ورگاز-نم.» یینی ءی-ادام: «هان تشتیت  
 زغ-تسغارت لی-ف-ک-وصّاغ اور-زغ-کیس-تشت. زغ-غیلااد ار-تیلی تاگات ف-واکال  
 ف-سبیت-نک. س-تکرایت اس-را-کیس-تافت ما-تشتات کولو ءوسان ن-تودرت-نک.  
 رایک-د-یسمغای-واکال تاسکرا ءولا ازگار، نتنی ا-زغ-را-دی-تکیست ما-تشتات.  
 س-لعرگ ن-وودم-نک اس-را-دی-تّارات اغروم ار تووریت س-واکال. اشکو زغ-واکال  
 ا-زغ-تیاوسکارت، د-واکال اس-را-تووریت.» «یزاید-ومارای یینی: «غمکان ا-ف-تخصر  
 دُونیت ف-سبیت ن-باباتّغ ادام، اشکو ءیفوغ نتان ت-تمغارت-نس زغ-واوال ن-ربّی.  
 والاینی ءورد غیر نتنی ا-یفوغن زغ-واوال ن-ربّی. ءولا تاروا-نسن سور س-غیلااد

ار-زغ-گيس-تفوگن. اطان ءولا تاكرائت ءولا لموت افلانغ-يلان كولواغ، اشكو ناگوش  
زغ-مايلى گينغ ءيرا ربى. >>

بينى-اس بو-وخرب: <<اوال-اد ايگا وين لحق د-صاحت. ميان ا-ف-تلا تاكات  
ف-دونيت، اشكو عينل-ت ربى، ءور-سور-گيس رجا.>> بىنى-اس-وماراي: <<تاكات  
افلاس-يلان ا-گما، والائى ءور-اغ-يفيل ربى بلا رجا. اشكو يوزن-اغ-د يان ءيضران  
ا-سيى تاكات. ءيضران ننان ا-يجوجي مدن ءيرار-اسن صاحت ءيكلن ءولا تودرت  
ءيدومن. سفلايت، را-يوون-ينغ ف-والى-د-بيون لباراكا ن-ربى زغ-يگنا ار اكال.  
يان-واس ءيفوغ زغ-يات-تمدين ننا د-يمحضارن-نس د-مدن گوتين، يلى غين  
يان-وبوكاض ءيسم-نس بارتيموس يوس ن-تيموس، ايكاور غ-تاما ن-وغاراس ار-يتضالاب.  
ليغ ءيسفلد ءيزد ننان ايد ءيزرين ار-يتغوات ار-يىنى <حنو گيگي، حنو گيگي.> اكين  
گيس مدن نان-اس <فسنا.> ءيما ننان ءيزويد ار-يتغوات س-وگار ار-يىنى: <حنو گيگي.  
حنو گيگي.> ءيبىد-ونجام-نغ بىنى ءي-مدن-ان <غرات-اس-د.> غرن-د ءي-وبوكاض  
ءينين-اس <غير تهننا. تنكرت، هاتي ءيغرا-ياك-د س-دارس.> ياكى-وبوكاض ءيگر  
س-وهدون-نس، ياشك-يد س-دارس. بىنى-اس-ونجام-نغ: <ما-تريت اد-اك-ت-سكرغ؟>  
بىنى-اس-وبوكاض <وا-سيدي، ريغ اد-يسفيوغ.> بىنى-اس <زايد غيلاد، تجيت اشكو  
تومن.> ييسفيو غاكودان، ءيصفورت غ-وغاراس.> گوتن ويياض، گان ءييضارن  
د-يكوشامن د-يثرام د-ويلى ءيسطار-وسلاي، ار-تن-يجوجي كولوتن.>>

بىنى-اس بو-وخرب: <<غوالى مي تينم انجام-نون، ءيبان گيس ءيس-ءيمر س-لباراكا  
ن-ربى، ءيجوجي مدن-ان زغ-تماضونت-نسن. والائى تاكات لموت، ننت ا-يشقان.>>  
بىنى-اس-داغ-وماراي: <<يان-واس ءيدا س-يات-تمدين لى-مي-تئين ناين، مون ديدس  
ءيمحضارن-نس د-ويياض گوتين. ليغ-ن-يلكم ءيمي ن-تمدين ءيمناكار كرا ن-مدن  
فوغن-د زغ-گيس، اسين-د يان-وفروخ ءيموت. ايگا يوس ن-يات-تهجالت، د-ننت  
ءور-دارس ابلا ننان. لان ديدس كيگان د-ايت-تمدين-ان. ليغ-ت-يثررا، تقاما گيس باهرا،  
بىنى-اس <اد-ور-تالات.> ءيروح-ن نعاش ءيگر-اس، س-بيدن غويلى-ت-وسنين، بىنى  
<واي-افروخ، نىغ-اك، نكر.> ءينكر-د غوالى ءيموتن، ءيدو ار-يساوال. ياوي-ت-ونجام

ءيفك-ت ءي-يناس. غووضن مدن-ان كولوتن ار-تالغن ربي ار-تينين «يوشكا-ياغ-د يان-نابي مقورن. ياكور-د ربي ا-يعاون مدن-نس.»

بيني-اس بو-وخريب: «انجام-اد، تلا دارس لقوا ا-يجوجي عيموضان، عيسنكر-د عولا ويبي موتين، واليني عيلا سور كرا ياضني غ-دونيت ار-ت-يسهراش عوگار ن-تاموخت عولا لموت. ات-يگان د-شر، تيميغت والا تازيت غ-كرايگات تاسگا.» بيني-اس-وماراي: «ءيلا دارك لحق ا-كما. عور-سين مدن مامنك اد-تحوبون عي-نكراتسن، صبرن معاوان ف-لخير عي-نكراتسن، اشكو كود يان ار-ن-يتضمعا غ-وين واياض، عور-يري ا-يفك لحق عي-يد-باب-نس.» بيني-اس بو-وخريب: «راحت عولا سلامت عور-را-تنت-ناف غ-واماس ن-مدن، اشكو كود يان ار-يگات ف-يخف-نس. تلا سور تاكات اد ف-دونيت. نتات ا-يشقان ف-كولو ما-يگان تاكات.» بيني-اس-وماراي: «ليغ عيتياوخلق ادام، عيفولكي س-وفولكي عيكلن. ليغ عيعاصا ربي عيووري عيكا زوند عوخريب. عولا نكني ن-تاروا-نس، عور-سور-نكي غمكلي-اغ-يخلق ربي. عيجرا-ياغ كرا عيسخصر-اغ.» بيني-اس بو-وخريب: «سنگ غيلاد ما-يغ-يجران. نفوغ زغ-واوال ن-ربي غمكلي زغ-كيس عيفوغ ادام. عور-سور-انسكار غمكلي كينغ عيرا ربي.» بيني-اس-وماراي: «تغزانت ا-كما. ما-نحتاجا غيلاد؟ نحتاجا يان-يضران ا-ينبو تيگمي-اد لي-يگان بنادم زغ-لجديد، عيسيتي تاكات زغ-وول-نغ. نحتاجا يان عيضران ا-زغ-كينغ-يسيتي دنوب لي-اغ-يسخصارن.» بيني-اس بو-وخريب: «ما-يضران ا-زغ-كينغ-يسيتي دنوب؟»

بيني-اس-وماراي: «يان-واس مون-د مدن گوتنين ف-ونجام-نغ غ-تگمي ايلغ عور-يقاما كرا ن-ووژو غ-وكنس عولا غ-يمي غ-برا. اشكين-د كوژ مدن اسين-د يان-ورگار عيكوشمن، واليني عور-يضران ات-ين-ساكورن عي-ونجام-نغ ف-سببت ن-تنوكموت. غلين عيلما س-وكفاف، سبتين يان-ووژون غ-يكي ن-يلغ عيلا، رژمن انقببي، زوگزن-ين عيمجدين لي-غ-يگن-وكوشام. عيژرا-ونجام-نغ مامنك ا-باھرا-سرس-ومن، عيساول س-وكوشام بيني-اس «واي-يوي، عيتين فلاك دنوب-نك.» لان غين كرا ن-يمسلمدن ن-شرع ار-سوينگيمن «ماخ ايلغ ا-يساول غواد غمكاد؟ اوال لكوفر ايد-ينا. ما-يضران ا-يسيتي دنوب ابلا ربي واحدوت؟» عيما انجام-نغ عيسن غ-روح-نس ماد-سوانگمن، بيني-اسن «ماخ ايلغ ا-تسوينگيم غ-يخفاون-نون غمكاد؟ ما-كيسن-يرخان، اد-ينغ عي-غواد

عڪوشمن «عيتين فلاك ڏنوب-نڪ» نيغدا-اد-ينيغ «نڪر، تاسيت عيمجدين-نڪ ار-تيدوت؟»  
 والايئي راد-اون-ملغ نيس-داري تاڙضارت اد-سيتيغ ڏنوب. «ايگراول غ-وڪوشام ييني-اس  
 «نيغ-اڪ، نڪر تاسيت عيمجدين-نڪ، تدوت س-تگمي-نڪ.» «اينڪر غاڪودان ياسي  
 عيمجدين-نس عيفوغ غ-لگڏام ن-مدن-ان. ار-تعجابن ڪولوتن ار-تالغن ربي ار-تئينين  
 «اور-جي-نثري زوند ماياد.»»

ييني-اس بو-وخريپ: «لعب اياد ا-گما. انجام-اد تلا دارس لقوا ا-يجوجي عيموضان،  
 عيسنڪر-د ويللي موتنين، عيفسي بنادم عولا زغ-يسڪراف ن-ڏنوب-نس. ڪولو مدن-ان،  
 عيسيتي فلاسن تاڳات، والايئي منشڪ ايد-س-يجرا ماياد؟» ييني-اس-وماراي: «ما-يتگان  
 سين عيد-والف ن-وسگاس اياد.» ييني-اس بو-وخريپ: «اه، اور-سور-يقاما-ونجام  
 غ-ڏونيت-اد، والايئي ڏونيت-اد سور فلاس تقاما تاڳات.» ييني-اس-وماراي: «سفلد  
 ا-گما عي-ما-را-يڪ-ينيغ. يوشڪا-د يات-توال ا-يغ-د-يميل نيس-يڙضار ا-يسيتي تاڳات،  
 والايئي را-د-يووري تيس سنات-توال غ-يسگرا ن-ڏونيت. غاڪودان ا-را-يسيتي تاڳات  
 ڪولوت، ايرار ڪولشي زغ-لجديد.» ييني-اس بو-وخريپ: «امار يوفان ا-تلڪم تاساعت-ان  
 ا-گما، تووري ڏونيت تگ تين لجديد. اشڪو ڏونيت-اد تهرش باهرا، اور گيس ڪرا  
 لفايت.» ييني-اس-وماراي: «تاکمور-د تاساعت-ان ا-گما، والايئي اور-اغ-يفيل ربي  
 غ-ڏونيت-اد ا-گيس-نگاور بلا لفايت. اشڪو والي-د-يوشڪان ا-يسيتي تاڳات، يوزن-اغ-د  
 نڪني ا-نعاون ويللي-سور-ف-تلا تاڳات. ايك-تين ار-يتگا ڪرايڳات ماني ار-يتعاون ڪولو  
 وانا ياغ ڪرا، ار-يتباد د-وانا عيضعفن. ييري گينغ ا-نسڪار عولا نڪني غمڪان.»  
 عيمناد-گيسن-وماراي عيزايد ييني-اسن: «نيس-ور-را-ناف مامنڪ ا-نسڪار لخير غ-ڏونيت  
 اور-تا-تري؟ نيس-ور-نرضار ا-يس-نزايد عيميك ن-وفولڪي ناقس-اس عيميك لخصانت؟  
 زرايت، ما-بينان تيگمي-اد؟ ما-يعزان انو؟ ما-يڙان عيسغارن؟ ما-يفرضن ازگار؟ ما-يسيتين  
 ايران زغ-واڪال؟ ايس-ور-سڪيرن غويلي زرينين ڪرا لفايت غ-ڏونيت-اد؟» ييني-اس  
 بو-وخريپ: «سڪرن غمڪان اشڪو ران اد-فلن عي-تاروا-نسن عوگار ن-ما-دارسن-يلاان  
 تنني.» ييني-اس-وماراي: «غمڪان ا-يغ-د-يقان عولا نڪني، باش ا-د-نفل عي-تاروا-نغ  
 عوگار ن-ما-دارنغ-يلاان؟»

عينڪر بو-وخریب غاكودان بيني-اسن: «فهمغ غيلاد عيزد لفايت عيشوان ا-را-ييلي  
 ٻي-تودرت-ينو. راديدون-مونغ ار-نسڪار لخير ٻي-وانا نمناڪار، ووريج-د ٻيلما اد-بنوغ  
 تيگمي-نو زغ-لجديد.» عينين-اسن ڪولوتن: «ا-فلاڪ-تيلي لباراڪا ن-رڻي.»  
 بيني-اسن-ومسيڪل: «اور-سور-را-يڪ-نتيني بو-وخریب. را-يڪ-نتيني بو-تگمي لجديد.»  
 عيدو-وماراي ار-پتيرير يات تالغات زغ-يموريڪن ن-رڻي ار-پتيني: «سبحايت ٻي-رڻي  
 ا-بنادم ڪولوڪن، تالغم-ت ا-ڪولو عيمزدغن ن-ڏونيت. تگوت فلاغ لحنانت-نس عيزگان،  
 اور-را-ياغ-يفل غ-ڏونيت عولا ليخرت.» ار-ڪولو-تاسين تالغات فرحن ٻي-نگراتسن.

## 15. غ-دار بو-يڪشوضن

نڪرن ٻيلما ڪملن ف-وغاراس-نسن غ-تاگانٽ. ليغ فتان ار-اسن-يتعاواد-ومسيڪل  
 ف-ما-يسن-يملا بو-يڪشوضن، بيني-اسن: «ار-يتمناد غ-يتران، عيبان-اس-د گيسن نور  
 ن-والي-تن-يخلقن. ار-يتمناد غ-تافوڪت د-ونگاي ن-واسيف، عيبان-اس-د گيسن لقوا  
 ن-رڻي. ار-يتمناد غ-يجديڪن ن-تاگانٽ، عيثر عيس-يعزا دار رڻي ما-يفولڪين. ار-يتمناد  
 غ-يبخوشن ن-واڪال، ييسان عيزد تاحڪيمت ن-رڻي اس-تياوسڪارن. والائي ٻيلما-ياس  
 لعائل-نس نيس-گينغ-يصامح والي-اغ-يخلقن، اور-سور-اس-ست-گينغ-يتاوي.» فتون ايلغ  
 لڪمن تيگمي ن-بو-يڪشوضن. يال-ومسيڪل اوال-نس عيغر س-باب-نس، اور-د-يساول  
 يان. عيسضوقر، اور-يلي يان. گاورن اد-سونفون. عيزري يان-وحشمي غ-گر عيسغارن،  
 سقسا-ت: «يس-ور-تريت بو-يڪشوضن؟» بيني-اسن: «عوهو.» عيسقسا-ت-ومسيڪل:  
 «يس-ان-يڪلا نغ دا-د-يتووري غ-ڪرا لوقت؟» بيني-اسن-وحشمي: «اور-يسين  
 تاووري-نس ابلا نتان.»

غير عيفسا-وحشمي س-سفلدن ٻي-توادا غ-گر عيسغارن س-تن-د-يلڪم بو-يڪشوضن.  
 عيفرح باهرا عينسالام د-ومسيڪل ت-تازويت بيني-اسن: «اوڪزغ-د اوال-نون  
 زغ-توگوت. ليغ-اس-سفلدغ، اشڪيغ-د حاينا اد-سرون-سمارحباغ ڪوني عولا  
 اسمون-نون. ڪشمايت س-تگمي.» عيسرس-اسن-د عيڪوزارن د-واضيل. ليغ گاورن ڪولو،  
 بيني-اسن-وماراي: «بو-يڪشوضن-اد ٻيلما-اغ ڪرا عيهيان. ليغ عيسفلد ٻي-واوال



ن-ومسیگل یاشکی-د حاینا، عور-ن-یماطل، اشکو عیغزا دارس. عیعارض-اغ عولا نکئی، اشکو نکا اسمون ن-ومسیگل. «ایمناد کئیسن عیزاید یینی-اسن: «غمکان ا-یکئا ربی. غاکود نا-یس-نغرا س-یسیم ن-ونجام-نغ ا-را-یغ-یسفلد. عور-را-ن-یماطل باش ا-سرنغ-یسمارحبا، اشکو عیغزا دارس والی-اغ-د-ییوین س-دارس.»

یینی-اس بو-یکشوضن: «سنگ نیس-یلا یان عیخلقن بنادم، والایئی عیلا-ن-غ-یکئا یائین عیفل-اغ-د-غ-دُونیت، کود یان عیماغ ف-یخف-نس.» یامز-اس-ومارای غ-وفوس یینی-اس: «ژر عیگضاض ن-یکنون، عور-ا-گرزن عولا-دا-مگرن عولا-دا-سمونون صابت غ-یحونا، والایئی ا-اسن-یاگا والی-تن-یخلقن کولو ماد-حتاجان. ژر عولا عیجدیگن ن-تاگانت ماد-لسان، عور-ت-اک-یلسی سولیمان غ-لهیبت ن-تکلدیت-نس. اشکو ا-گما، یان عیطافن تاروا عور-را-تن-یفل ا-تزیادن واحدوتن. را-تن-یکابل ا-اسن-یجوجاد کولو مایلی حاجان. عیغ-ا-نسکار نکئی عی-تاروا-نغ غمکا، عیزد باباتنغ ن-یکئا عور-را-یغ-یسکار عوکار ن-ما-نسکار عی-تاروا-نغ؟» عیزاید-ومارای یینی-اس: «عیرا ربی ا-یس-بدا-نتینی ف-کولو ما-یغ-یهمان عولا کولو ما-نحاجا. عیلا غ-واوال-نس: «ضالبات ربی راد-اون-یفک، سیگلات دارس را-تافم، سضوقرات-ن سرس راد-اون-یرزم.»

یینی-اس بو-یکشوضن «عیس-ا-کئیغ-یتها ربی زوند یان عیتھلان غ-تاروا-نس عزانین؟ والایئی یان غ-ا-تقمان تاروا-نس، عیس-ور-را-فلاس-یسیتی ما-تن-یسالان؟» یینی-اس-ومارای: «غمکان-نیت ا-یجران ا-گما. یوشکا-د-ونجام-نغ عیسیتی فلاغ کولو ما-یغ-یسویدن عولا ما-زغ-نکسوز، عیعمر عولاون-نغ س-سلامت عولا رجا.» عیساول-د-ومسیگل یینی: «نشکر ربی فلاس باهرا.» عینین وییاض کولوتن: «امین. امین.» عیتعجب کئیسن بو-یکشوضن عیسقسا-تن: «عیس-تومنم کولوکن س-ونجام-اد؟» یینی-اس بو-وخریب: «یوشکا-د-ایسیتی تاگات ف-دُونیت.» تینی-تفقیرت «عیشکشم-اغ-د-س-ونتال لمان.» یینی-وکساب: «عیملا-یاغ مامنک ا-را-نامز رضا ن-ربی.» یینی حامو لجدید: «عیرور ویلی اُخشنین اد-فولکین غ-دار ربی عولا مدن.» یینی-ومزیل: «عیخلص دین لی-فلاغ-یلان.» یینی گماس: «عیسکر سلامت غ-کراغ د-ربی ا-ور-نیکساض زغ-واس حساب.»

بيني-وماراي: «ڪولو ماياڊ نان ايتمان، ٻيلا دارنغ غيلاڊ، والائيني غ-مايد-يفتان ٻيرا-ييلي ما-يوگرن ماياڊ. اشڪو س-تحڪيمت لئي-س-يخلق ربي ڏونيت-اد ا-س-را-يسڪر ڏونيت لجديد. را-تفنو ڏونيت-اد تاقديمت س-لعافيت، ٿياوسڪار طايا تعمّر س-ڪولو ما-يگان افولڪي. انجّام-نغ، ار-اس-ٽينين مدن «باب ن-ساعت» اشڪو را-د-يووري غ-يسڪرا ن-ڏونيت، ٻيسنڪر-د ويلي موتنين ٻيشڪشم-تن س-تودرت لجديد. ٻينا نٿان «اد-ور-ٽعجابم غ-ماياڊ، اشڪو را-دي-تاشڪ تا ساعت لئي-غ-راد-سفلدن ڪولو ويلي ٻيلان غ-يسمضال ٻي-واوال-ينو. غاڪودان ا-راد-فوغن.» ٻيرا-ٻيضو ويلي سرس ٻومنين د-ويياض يا ضني، ياوي ديدس ويلي گانين وينس س-تودرت لئي-ٻاهرا-يوفن تودرت ن-ڏونيت-اد.»

ٻيسقسا-ت بو-يڪشوضن: «ويلي موتنين، مامنڪ ا-را-د-نڪرن زغ-ڏو-واڪال؟ ٻيس-ور-ا-ٿووري ڏات تگ اڪڙور؟ مامنڪ ا-را-دي-ٽنڪر؟» بيني-اس-وماراي: «ڙر لمعنا لفاخر. تالفاخرت-اد تگا-ٽين تگا-يان-وڪڙوم ن-وڪشوض. اسي-ت، توت سرس س-ترزا، تڪومت-ست س-تگا تاناغدا. والائيني ٻيغ-تمضلت تالفاخرت-اد غ-واڪال، ٻور-سار-ترڪيم ٻولا تخصر. واخا-ست-ين-تفلت سموس ٻيسگاسن، ٻيگ-ٻيٽ تاگرت نيغڊ ٻيگا صيف، غمڪلي تگا ا-را-بدا-تقاما. ٻيني-ٻي، تالفاخرت-اد، ما-ست-يڪشمن ايلغ-ت-يرور ا-ور-سار-تخصر؟» بيني-اس: «لعافيت ا-ست-يڪشمن ترار-ت تگ تالفاخرت.» بيني-اس: «ٻيما لعافيت، ما-تگا؟ اشڪو لعافيت لئي-ٻيٿلاڪن ڪولو اينا تلڪم، نٿات ا-يرورن تاڪشوط ا-ور-سار-ٿهلاڪ. لعجب ايا، ٻيگا زغ-لعجايب ن-سيدي ربي. لئغ ٻيضرار ا-يسڪر غونشڪان غ-وزمز-اد ن-تاگات، ٻيس-ور-ٻيضرار ا-يسڪر ما-يوگرن ماياڊ غاڪود لئغ را-يرار ڪولشي زغ-لجديد؟ اشڪو را-يرار ڏات لئي-ٻيضفن تموت، تگ ڏات ٻيصحان تدوم، ٻيرار ڏات ن-ڏونيت-اد، تگ ڏات ن-يگنا.»

بيني-اس بو-يڪشوضن: «صاحت ايد تنيٽ ا-گما، اشڪو ڙريغ-ت غ-ٻيخوشن ن-تاگانٽ. زوند تاساڪم ن-وامان، تضلا ار-تعموم غ-ڏو-وامان. اينا-س-ا-تمقور، ار-تسڪار ٻيضران، ار-ٿووري تگ اڪرو ٻيزگراون ار-ٻيٿاڪي ف-ٻيگي ن-واڪال. نيغڊ زوند يان-وبخي، ٻيٿاف ٻيضران گوتنين ار-ٻيٿتا ٻيفراوين ن-توگا، يان ڪرا س-ٻيگا ٻيلولي ار-ٻيسوموم ٻيجديڪن ار-ٻيٿالال غ-يگنوان. لئغ ٻيضرار ربي ا-ٻيدل ٻيخوشن، ٻور-را-فلاس-ٻيشقو ا-ٻيدل ڏات-نغ ٻولا نڪني ن-بنادم.» ٻيزايد بو-يڪشوضن بيني: «ماياڊ ڪولو ٻيان ٻي-والن ن-يان

عيسموقولن. والايئي مرايس-ور-د-توشكيم كوني عور-راد-يسانغ لمعنا-نس. «يني-وماراي:  
 «ا-نشكر ربي اشكو نتان ايع-د-يسباين لحق غمكلي عيكا.»

الن اوال-نسن كولوتن ار-تاسين اماركي «الغات ربي اشكو نتان ايفولكين. ار-بدا-يسكار  
 س-لحنانت-نس عيزكان.» زرین کرا ن-ووسان دار بو-يکشوضن، زايدن عيلما اد-کملن  
 ف-وغاراس س-ودوار ن-ومسيگل ت-تازويت. عيمون ديدسن عولا نتا.

## 16. امانگار غ-ودوار

فوغن زغ-تاكانت زرین زغ-گر عيگران، ژرن اكال عيقور عيستغ كولو. ترا لوقت انزار  
 باهرا. اكمورن س-ودوار، ار-ساوالن عي-نگراتسن، ابلا تازويت تفسا. تزري س-تاما  
 ن-تامنت تسقسا-ت: «ايس-اغ-د-يقان نكي د-گما اندو س-ودوار-نغ؟ ايس-ور-نرصار  
 ان-نووري س-دارون؟ اشكو تارفونت ايع-يلان غيد.» تيني-اس: «ا-ور-تيكساط  
 ا-تازويت. را-ديدنغ-بيلي والي عيضران ا-كن-يسنتال زغ-كولو ما-يسرفوفون.»

عوتن-ين يان سين عيزموزال تيني-اس تازويت: «تقاما-كيكي-تفقيرت-اد تيكليت.  
 عيسوفغ-ت-يد-ورگاز-نس گسن-اس تاروا-نس. تقاما واحدوت غ-تاكانت، عور-دارس يان  
 ا-كيس-يتهلا.» تيني-اس تامنت: «نکني ن-ايت-سلامت، عور-دارنغ-يزري ا-نفرو  
 عي-تمغارت. غ-واس ن-تمغرا ار-ياگا-وسلي ت-تسليت لعهد عي-نگراتسن ا-بدا-تيرين  
 ار-تصبارن عي-نگراتسن.» تيني-اس: «لعجب ايا د.» تزاید تامنت: «اشكو غ-يسيزوار  
 عيخلق ربي يان-ورگاز عيفك-اس يات-تمغارت. عور-اس-يفكي سنات نيغد گورط. غمکان  
 ا-يسکر باش اد-تمعاون عي-نگراتسن غ-كولو ما-يشقان، ار-تفراحن عي-نگراتسن غ-كولو  
 ما-يشوان. عيما تافقيرت، عور-تا-نسين ما-را-يس-بيلي عولا مامنك ا-را-كيس-يبارك ربي،  
 اشكو عيلا غ-واوال-نس «غويلي عيتيرين ربي، عيغرا-ياسن-د غمكلي عيقصاد، نسن  
 ايس-ا-يسن-يسكار افولكي غ-كولو ما-يسن-يجرون.» عومنغ اوال-اد. عور-كيس شك،  
 ايرا-يس-يسکر افولكي.»

سور فتان س-د-يضر غ-يخف ن-ومسيگل لعادو-نس ايگيدر لي-ت-يسروفن غايد عيزرين.  
سور ماغن عيسوينگيمن-اد غ-يخف-نس س-ا-يترشيش-ونزار، امژن انتال ن-يات-تسغارت  
ن-يگ. بيني-اس-وماراي: «ما-يک-ت-يسطبييرن اي-امسيگل؟» بيني-اس: «ا-ودّي،  
ا-خالي اماراي، کتيغ-د يا-لعادو عيلا غ-تمازيرت-اد. عور-سنيغ ما-را-يس-سکرغ.» فسّان  
ار-تمنادن غ-ونزار لي-يطارن. بيني-اس-يلمّا-وماراي: «ژر ايگران-اد، عيقور-واکال-نسن.  
حتاجان ايت-ودوار-اد امان باهرا. عيما غيلاد عيغيت-تن-د ربي زوند عيغ-اسن-د-نيوي نکني  
لباراکا زغ-يگنوان. غمکاد ايسکار س-لحنانت-نس. ما-را-تيني اي-امسيگل؟  
يس-ور-را-نسکار عولا نکني افولکي اي-ويلي گنيغ عيسکرن ما-يخشن؟ اشکو  
ئيئا-ونجام-نغ «حنوات غ-ينواشن-نون، تضاليم ربي ا-يرحم غويلي-کن-سرفوفين. غمکاد  
اس-را-تکم زوند ربي لي-يلان غ-يگنئا.» عيمناد-گيس-وماراي بيني-اس: «اي-امسيگل،  
عور-تا-نسني ما-را-يسکر ربي غ-ودوار-نون.»

ليغ عيبي-ونزار، کملن ف-وغاراس-نسن. فتون ما-يتگان مناص ن-تاساعت، لکمن-ين ادوار  
س-دگات. عيضر-اسن لعجب اشکو عوفان-ين ادوار عيفسا، زوند عيغ-يخوا زغ-بنادم.  
عور-ن-وفين يان غ-يگران عولا غ-يمي ن-تحانوت. لکمن-ين تيگمي ن-ومسيگل  
ت-تازويت، افن-ين کرا ن-مدن بيدن غ-يمي. عيسقسا-تن-ومسيگل: «ما-غيد-يلان؟»  
عينين-اس: «تلا-تماضونت غ-ودوار کولوت. کرا عيموت، کرا ياکمور-د س-لموت. هان  
جديک عيگلين غ-تگمي، عيفتا گيسنت.» عيسقسا-تن-ومسيگل ف-باباس:  
«يس-د-يوشکا نيغد سور-ن-يلا غ-تمدينت؟» عينين-اس: «لاخبار-نس عور-ا-سفراحت.  
عيلا-ن غ-لحبس.»

عیکشم-يلمّا-ومسيگل ت-تازويت س-دار-وقفير. عيرژم-د-وقفير الن عيمناد گيسن،  
اکمورن-ين س-تاما-نس. ار-يتمشموش بيني: «امار يوفان ا-د-کا-تووري ا-ست-يژر يان  
عور-تا-يفتي. کرايگات بنادم ار-يتخلاص ف-لافعال-نس.» بيني-اس-ومسيگل: «عور-فهيمغ  
ا-جدي ما-س-تنت.» ار-تلا تازويت. سفلدن عيلمّا اي-تيجيغت غ-يمي ن-تحانوت،  
تکشم-د-تفقيرت تاسي-د يا-لکاس. تفک-ت اي-تازويت تيني-اس: «فک-اس-ت ا-يسو.»  
عيتعجب-ومسيگل ت-تازويت. فکن-ت اي-وقفير، يامژ لکاس عيسو اسفار. عيقن عيلمّا  
الن-نس ياوي-ت-بيضص. فوغن ار-کولو-الن، عور-سني عيس-را-يدر نيغد را-يمت.

ءيسمون-تن-د-يلمّا-وماراي ييني-اسن: «ياغ-وزال. مل-اغ مانيع ءيلا كرا لعاين، اشكو  
 ءور-را-ناگم زغ-وانو-اد.» دُون اوين-د امان زغ-لعاين. تزري يات تاساعت، ضرت  
 تيلاس، مون-د كولو غ-توزونط ن-تگمي زالن عينين: «وا-ربي سيديتغ، كيي ا-يخلقن  
 دُونيت ءولا كولو ما-گيس-يلان. نسن عيس-تضرارت ا-تجوجيت افقيير. نضالب زغ-گيك  
 ا-تسباينت تاحكيمت-نك ءولا لحنانت-نك غيلاد ءي-ايت-ودوآر-اد، ترارت-اس-د  
 صاحت-نس، س-يسم ن-ونجام-نغ.» عينين كولوتن: «امين.»

تزري تاساعت ياضني، ياوي-تن-بيضص كولوتن، ابلا اماراي د-ومسيگل ا-يووزن. ما-يتگان  
 كراط تاساعين س-د-يتفاق-وفقيير، عيضالب-اسن ا-يسو، فكن-اس. نكرن زيڪ صباح، سور  
 ءيكن-وفقيير. كشم-د-وادجارن، اوين-اسن-د تاگلا. عيسقسا-تن-وماراي: «نيزد غير  
 ايت-ودوآر-اد ا-يهرشن س-تماضونت نيغد ءولا ءيدوران ياضني؟» عينين-اس: «غير نكي.  
 حاقان عيخلص-اغ ربي ف-لافعال-نغ. اشكو ءيدوران ياضني، ءيهتا دارسن لحال.»  
 ءيدو-يلمّا-وماراي د-ومسيگل اد-ژرن انو. ءور-اسن-يبان يات، والايي تلا گيس يات  
 توجشجشوط يُخشن. ءيگز-وماراي ايليع ءيلكم امان، عيغلي-د ءيلمّا ييني-اس  
 ءي-ومسيگل: «ءيعمر س-يسلمان.»

وورين س-تگمي اد-غرن ءي-ويلي ديدسن موئين. افن-ين افقيير ءيگاور غ-لفرش-نس، تيتي  
 زغ-گيس تاوولا. ليغ-تن-يژرا ييني-اسن-د: «اشكاد كولوكُن، ا-يوون-ينيع كرا.» مون-د  
 كولو فلاس. ييني-اسن: «ها-نكي سكرغ ما-يي-يسحشامن. اشكو سفلدغ س-تكركاس  
 ن-تيلي ءيگان گريي ت-تمغارت-ينو.» يامز ءيلمّا ءي-تفقيرت غ-وفوس ييني-اسن:  
 «تامغارت-اد تامباركيت، نتات ا-يي-يكيسن ءي-لموت. نكي سكرغ گيس لعار، نتات  
 تسكر گيكي لخير. نكي سؤفغ-ت زغ-تگمي، ءيما نتات تسؤفغ زگيكي تاوولا.  
 عينيات-يي، ما-يي-د-يقان غيلاد؟» فسان كولوتن، عيساول-د-وماراي ييني-اس: «اوي-ت  
 ا-خالي، غمكلي ءيرا ربي. تامغارت-نك ا-تگا، اشكو ءيتيارا «اينا ءيسمون ربي،  
 ات-ور-بيضو بنادم.» فرحن كولو س-واوال-اد. ييني-اسن-ومسيگل: «نژرا غاساد  
 عيس-يژضار ربي ا-د-يسمون وينا بضانين.» ييني بو-يکشوضن: «ءيژضار ا-يغ-د-ياگا كولو  
 ما-نحتاجا.» ييني بو-وخريب: «ءيژضار ا-يبنو اينا ءيخلان.» ييني-وكساب: «ءيژضار

ايغ-يفوگو زغ-تاساست نا-غ-نلا. >> بيني حامو لجدید: >> ايژضار ا-يرار ما-يُخشن س-وفولکي. >> بيني-ومزيل: >> ايژضار ا-زغ-کينغ-يسيتي کولو ما-يغ-يشحشامن. >> تمناد-کولو-کيسن-تفقيرت تيني-اسن: >> ايژضار ا-يغ-يشکشم س-لامان. اشکو اينايي غ-توارکيت > غ-تودرت ن-دونيت-اد ا-غ-را-تثرت افولکي ن-ربي. > هاتي غيلاد ژريغ-ت. >>

سور ا-ساوالن س-د-يکشيم يان-ورکاز. توت تازويت س-تغييت تئا: >> ها-بابا. >> ايگا باباس ن-ومسيگل ت-تازويت، ايگ يوس ن-وفقيرت-تفقيرت. ازلن دارس، ار-کولو-ساوالن ار-سمقسان اي-نگراتسن ار-تشکارن ربي. عيضالب زغ-کيسن اد-فسان باش ا-يسن-بينی ف-ما-يس-يجران: >> يان-واس نغ-اي-بو-شي ا-بي-يخلص. عور-يري، ماغ ديدس اوين-بي س-لحبس. والايي شکرغ سيدي ربي ف-کولو ميان، اشکو مناگارغ-ن سين مدن غ-لحبس. سقساغ-تن ماد-سکرن، عينين-بي عور-سکيرن کرا يخشن. يات-تغاوسا کادارسن-يلان، ار-تزالان اي-ربي س-يسم لماسيح. نغ-اسن > عور-يکي لعيب ا-تزالام. > ليغ-تن-سقسان عور-کيسن-وفين کرا عيفوغن لقانون، رژمن-اسن غاکودان. والايي ساوالن ديدي ف-لماسيح، عينين عيس-ت-يد-يوزن ربي ا-يسکر لعهد ن-سلامت غ-گراس د-بنادم. يعجب-بي-واوال-نسن. سقساغ-تن مانغ سفدن اي-کولو ميايد، عينين-بي عيس-گوتن ويلی عومنين زوند نتني غ-تمازيرت-نغ. >>

ليغ سفدن اي-غونشکيد، فرحن کولوتن ار-تشکارن ربي. اينکر-يلما-وماراي يامز غ-باباس ن-ومسيگل ت-تازويت بيني-اس: >> نثرا غاساد نيزد صاحت ا-يگا-واوال ن-ونجام-نغ ليغ ايناي > نکي ا-يگان تيفاوت ن-دونيت. وانا ديدي عيتمونون، راد-اس-تيلي تيفاوت ن-تودرت، عور-را-سار-يفتو غ-تيلاس. >> >> عيتعجب باباتسن، عيماناد کولو کيسن عيسقسا-تن: >> >> عيزد عولا کوني تومنم س-لماسيح؟ >> بيني-اس-وماراي: >> اغاراس لماسيح، عومزن-ت ايت-ودوار-نغ غ-زمان. >> عيتعجب باباتسن س-وگار عيسقسا-ت: >> ويلي زرينين، عيس-ومن نتني س-لماسيح؟ >> بيني-اس: >> ما-کيسن-يگوتن گان عيماسيحين، عيلين کيسن عولا لعولاما مقورنين. گان ايت-تمازيرت-نغ، تياوسان سور س-غاساد غ-دونيت کولوت. >> عيزايد-وماراي بيني-اس: >> فلن-اغ-د-يا-لکتاب عيقدمن، عيتيارا کيس ف-ما-يسکر-ونجام-نغ لماسيح عولا ما-يناي. >> عيسقسا-ت: >> عيس-سور-دارون-يلا لکتاب-اد؟ >> بيني-اس: >> سور دارنغ عيلا. واحا ايگا غونشکيد ن-وسگاس، عور-زغ-کيس-تخصا کرا ن-تووريقت. >>

ءيسقسا-ت: «ءيس-ا-كولؤ-تاقرام غ-لكتاب-اد؟» بيني-اس: «كود يان كيتغ ار-زغ-كيس-يتاسي غايلى ٲيرا، يارا-ت باشا ا-ت-يحصو ٲي-تودرت-نس.» لىغ سفلدن ٲي-ماياد فرحن كولوتن، تعجبن غ-مايلى ٲيسكر ربى.

## 17. اغاراس ن-سلامت

دؤن ٲيلمّا س-وانو. ار-سيتين ٲيسلمان س-دلوات، ار-ن-تفين امان غ-يان ماني ٲيخوان. غمكان اد-خدمن سموس-ووسان ايلىغ سغوسن انو، كن-ين كيس يان-وسافار ما-ينقان اينّا سور كيس ٲيقامان.

غاكودان اد-روحن كرا ن-مدن، زوكرن-د يان-وفروخ ٲيتياساس س-يزاكارن. ياكزت-ومسيكل نيزد ٲيكيذر ا-يكا. ٲيسقسا مدن-ان: «ما-ٲيون-يسكر؟» ٲينين-اس: «واش-اد يوكر-اغ تاموكايت. ائور لى-يزرين يوكر تومرين ٲي-ايت-سوكا. ٲيمال غاساد يوكر اقراب ٲي-عادى غ-تبحيرت. د-غواد ا-ستين ٲيكان يوكر صندوق ن-تحانوت غ-وزمز لى-غ-ك-سمسرن مدن زغ-ودوار.» بيني-اسن-ومسيكل: «عافاكن، فلايت-ٲي نكى ديدس ا-سرس-ساولغ.» بيدن غ-وغاراس، بيني-اس-ومسيكل: «وا-يكيذر، نيزد صاحت تسكرت كولؤ ماياد؟» بيني-اس: «ا-ودى، ٲيموت بابا د-ينا س-تماضونت-اد، د-ايتما مزينين ٲور-دارسن يان ابلا نكى. د-نكى غيلاد را-ٲي-اوين س-دار-ومغار.» بيني-اس-ومسيكل: «ا-ور-اسن-تاسيت لهم ا-يكيذر. را-كيسن-نتهلا ارد-دي-تووريت.» بيني-اس ٲيلمّا ٲيكيذر: «واي-امسيكل، ماخ ايلىغ تريت ا-كىكى-تسكرت افولكى د-نكى سكرغ كيك لعار؟» بيني-اس: «را-يك-ينىغ ماخ، تفرحت ٲولا كىي تيسانت اغاراس ن-سلامت.»

غ-يض-ان ا-ٲواركا-ومسيكل، ٲيثر غ-تواركيت-نس يا-لملاك ٲيبيد غ-تحانوت لى-غ-ا-يكان-وفقىر. ٲيفك-اس-د لملاك اكلزيم، ٲيمل-اس مانىغ ا-يقاز غ-ووژو ن-تحانوت-ان. ار-يقاز ار-يقاز ايلىغ ٲيلكم كرا ٲيقورن، ٲيزايد ٲيغزا ايلىغ-اس-بيان يان صندوق ٲيمقورن ن-وكشوض. ٲيرزم صندوق ياف-ت-ين ٲيعمر س-وورغ د-نقرت. لىغ-د-ٲتفاق غ-صباح، ٲيدو ٲيعاود ٲي-جديس ف-ما-ٲواركا. ٲيمناد-كيس-وفقىر بيني-اس:

«ہاتی عیلکم-د-وزمز اد-سروحغ لامنت لئی-د-داری-یفل سیدی ربی. اوی-د اکلزیم»  
 عیدو-ومسیکل ار-یقاز غ-واکال ن-ووژو-لی، ایلیغ عیلکم کرا عیقورن. عیسیتی اکال  
 ایلیغ-د-بیان صندوق زوند والی عیژرا غ-توارکیت. رژمن-ت-افن-ت-ین-یعمر س-تانبالین  
 ت-تزرژای ن-وورغ عولا نُقرت. «ایسقسا-ت-ومسیکل: «مانی-د-سرك-یکّا لخیر-اد  
 ا-جدی؟» بینی-اس: «بابا نکّی، ایکّا-تین ایکّا اصیّاغ غ-دار-وگلید، عیفل-یی-د کولو  
 مایاد بینی-یی «حضو لامنت-اد-ار-یغ-توفیت یان عیژضارن ا-یسکر سّلامت غ-گراغ-د-ربی  
 عولا غ-گر بنادم د-وادجارن-نس عولا غ-گر بنادم د-یخف-نس. ہاتی غیلاد عیسیباین-اغ-د  
 ربی عیس-د-یروح-وزمز ن-سّلامت.» بینی-اس-ومسیکل: «والاینی ما-را-نسکر س-لخیر-اد  
 ا-جدی؟» بینی-اس: «را-سرس-نسکر لخیر. زاید ای-یوی عیجزان، تبنوت یات شکویلا  
 لئی-غ-راد-افن تاروا مژنین لجاواب ف-کولو عیقسیتن-نسن، تبنوت یات-تکمی  
 ن-تماضونت ما-غ-ا-تجویم وینا ہرشنین، تبنوت یات-تکمی ن-تووری ما-غ-ا-تخدامن  
 وینا حتاجانین. تفکت تودرت لجدید عولا رجا عیصحان ای-کولو ایت-ودوار-نغ.»

بینی-اس-ومسیکل: «وا-جدی، تثریت-ن کولو مایاد زغ-توگوت. تفہمت-ت تیسّانت-ت  
 عور-تا-یجری.» بینی-اس: «نکّی عور-سینغ یات، والاینی ار-بدّا-ترجوغ زغ-تاساعت  
 لئی-غ-د-یلول-واراو غ-گر-ووسمان د-یکٹیغ ار-یضصّا. غ-یض-ان اد-نیغ «لفرتونت  
 ا-د-یزوورن ای-واراو-اد، نتان ا-را-یس-یکرو، عیلول-د-غ-تیلاس را-یغ-یزوور س-تیفاوت،  
 عیلول-د-س-ووسمان د-یکٹیغن را-یغ-یسہنو زغ-کولو ما-یکاتن.» ہاتی غیلاد ای-امسیکل،  
 تکمّلت غایلی سوانکمغ اشکو توفیت اغاراس لئی-یتاوین س-سّلامت.»  
 عیقسا-ت-ومسیکل: «عیس-تومنٹ ا-جدی س-ونجام-نغ؟» بینی-اس: «ژریغ نکّی یان  
 عیژضارن ا-یرار لغار س-لخیر، عیرار تاثریت س-سّلامت، عیرار عیمطاون س-لفرح، عیرار  
 ما-یخشن س-وفولکی، عیرار عینواشن اد-کن عیمدکّال عزّانین. ژریغ لمعجیزات لئی-یسکر  
 غ-گراتنغ. ما-یی-یخصّان عوکار ن-مایاد باش ا-سرس-امنغ؟ عور-یلی ما-یژضارن ا-یسکر  
 سّلامت غ-گر بنادم د-ربی، عیسکر سّلامت غ-گر بنادم د-وادجار-نس، عیسکر سّلامت  
 غ-گر بنادم د-یخف-نس ابلا نتان.» عیزاید-وفقیّر بینی-اس: «ہا-غیلاد، کمّغ  
 ما-فلا-یتیاران، سلکمغ لامنت ن-ربی. ماطلغ نکّی غ-دّونیت-اد، ریغ اد-کشمغ س-یلی  
 عزیزگان عیدوم. تلاّ داری تیقا غ-والی-س-ومنغ نیس-را-یکابل لامنت-ینو ار اسّ عیگران.»



ار-يالآ-ومسيكل، بيني-اس-وفقيير: «اور-تالات اي-يوي. را-ك-فلغ غ-لهنا د-راحت ار-د-داغ-نمناكار غ-يكتا.» غير عينا اوال-اد س-نفوغ روح-نس.

تقاما-تفقيرت تزدغ د-ومسيكل د-وولتماس، ار-تسناو ار-دي-تاكم ار-تكو، ار-كيسن-تهلا نتني د-ينبكيون-نسن د-ايتماس ن-يكيذر. معاون كولوتن اد-بنون مايلي-ف-تن-يوصا-وفقيير. عيما باباتسن عيووري س-تمدينت، يازن-اسن-د يات-تبرات عيساول-اسن-د كيس ف-تووري-نس عولا ف-ايتماتن عيماسيحيين لي-د-يتمناكار غ-تمدينت.

ليغ زرین کرا ن-بيرن، نکرن عينبكيون. کرايکات يان ايرا-ايووري س-تمازيرت-نس، ابلا تافقييرت تقاما. کود سين-بيرن ار-دي-توورين عينبكيون-ان س-دار-ومسيکل ت-تازويت، ار-کولو-تمونون ار-تالغن ربي، ار-اقران زغ-واوال-نس ار-زعامن اي-نگراتسن. اس ف-واس ار-يسلماد-ومسيکل غ-شکويلا ار-ت-سقساں تاروا ف-کولو ما-ور-سين، ار-اسن-يمالا لعيلم ن-دونيت د-وين عيکتا غ-لکوتوب لي-اس-دي-تاوين ايت-سلامت. ار-تخدام تازويت غ-تکمي ن-تماضونت، ار-تاکا عيسافارن ن-تفقيرت اي-وانا ياغ کرا. خدمن ويياض غ-تکمي ن-تووري، ار-سکارن عيفوا ن-تاضوط، ار-سکارن صاندارا ن-يلم، ار-سکارن عيفشکان د-يروکوتن ن-وکشوض. عيشوا عيدوس کولو ماد-تعديلن ار-ت-زنان غ-سوق، ار-تيرين مدن سلاعت-نسن ار-تينين «ختاد ايدوسن تشوو. هاتي لخدمت ن-ايت-ومسيکل ايا د.»

زرین-بيرن ايلغ عيتاهل-ومسيکل تامنت، سکرن لعهد عيزگان ا-بدا-تمعاون ار-تيرين ار-تصبارن اي-نگراتسن. ليغ-د-يفوغ عيکيدر زغ-لحبس، يامز عولا نتان اغاراس ن-سلامت، تکرار-ت ف-کولو غايلي عيسکر يخنش. تزر تازويت عيس-بيدل عيکيدر باهرا، ار-يتعوان وانا ايران ايلمد تاووري لجديد. عيضالب-ن عيلما تازويت، سکرن عولا نتني لعهد عيزگان اي-نگراتسن.

د-غمکاد اس-يعمر-ودوار س-سلامت عولا لباراکا ن-ربي. عيگوت ما-د-يتاشکان ا-يثر مامنک اد-سکارن ايت-ومسيکل. عيگوت ما-يومن غ-ووسان-ان ار-تاوين لاخبار س-يدوران ياضني. د-غمکان اس-ا-تزايد سلامت ن-ربي غ-تمازيرت-نغ ار-تروح کرايکات ماني.

ار-تاسين امارك ار-تئين «وا-رَبِّي سيديتَّغ، عيسم-نك ا-يمقورن غ-دُونيت كولوت.»  
ار-داغ-تئين «اكال وين رَبِّي ا-يكا، والا كولو ما-كيس-يلان. دُونيت تين رَبِّي ا-تكا، والا  
كولو ما-كيس-يزدغن.»